

TUTÚ QUIHIⁿ NDAHA CUE ÑÁYIU HÈBREÚ

Dútú Ndiõxí ní cachí-gá sá Dèhe-gá cada núú-gă

¹ Te ndéé sanaha, Yá Ndiõxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú nchàa ñaní tnáhá-ó nǐ xindecu ndéé dàvá-áⁿ te ðiu ducaⁿ nǐ quide-güedé. Te titní xito ducaⁿ nǐ xáhaⁿ-gă xii-güedé ní cáháⁿ-güedé tnúhu-gá. Te ndi ðííⁿ ndì ðííⁿ nǐ xítñúhu ñaha-gă xii-güedé nàcuáa cáháⁿ-güedé tnúhu-gá núú-yu.

² Te sátá nǐ cuu vâi nduu ta yáha cuáháⁿ, te ní sáá nduu nǐ cachí Yă Ndiõxí sá Dèhe-gá cada núú-gă cáháⁿ tnúhu-gá núú-ó. Te ðiu-ni mee-gă ní táúchíúⁿ nǐ cadúha Dèhe-gá ñuyíú ndihí nchaa sá ió, te ní cachí-gá sá ncháá cùu-xi cuendá Dèhe-gá.

³ Te Déhe Yá Ndiõxí ío càhnu cuu-gá dàtná càhnu cuu mee-gá, te dàtná-ni sàni iní méé-gă ðiu-ni ducaⁿ sàni iní Déhe-gá chi tnáhá-gá cúú-gă Ndiõxí, te sá cuendá tnúhu càháⁿ Déhe-gá xíăⁿ ndécú-ní nchàa sá ió ñuyíú, te ducaⁿ chi ío càhnu cuu Déhe-gá, te ðiu-ni Déhe-gá ní quide nàcuáa vá cündècu-gá cuèchi-o. Te sátá dúcáⁿ te ní ngóo-gá xio cùha Tátá-gă Dútú Ndiõxí Yaá ío cùnuu ndecu andiu.

Déhe Dútú Ndiõxí ío-gá cúnùu-gá dàcúúxí cue espíritú xínú cuèchi núú-gă

⁴ Te Déhe Yá Ndiõxí ío-gá cúnùu-gá dàcúúxí cue espíritú xínú cuèchi núú-gă, te ducaⁿ chi ní nduu

táhú-gă núú Tătá-gă Dútú Ndiöxí sá ïo-gá cunuu-gă dácúúxí cuè espíritú-án.

⁵ Chi Yá Ndiöxí ñá túú ní xăhaⁿ-gă xii ni ñⁿ cue espíritú xínú cuèchi núú-gă dàtná ní xáhaⁿ-gă xii Déhe-gá, te duha ní xáhaⁿ-gă:

Yòhó cúú-n Dêhe mee-ï,

te ducaⁿ-ni cùndecu-n núú ndécù-í.

Duha ní xáhaⁿ-gă. Te ní cachí tucu Yá Ndiöxí:

Yúhú cúú-í Tătá Yáá-ăⁿ,

te mee-gă cúú-gă Déhe-í.

Duha ní cachí-gă.

⁶ Te cútnàhá ní tendaha-gă Déhe-gá Yáá ío cùnuu ní quixi-gá ñuyíú-a, te ní cachí-gă:

Tàú-xi sá ncháá cuè espíritú xínú cuèchi núú-í chiñuhu-xi Déhe-í.

Duha ní cachí-gă.

⁷ Te Yá Ndiöxí ní cáháⁿ-gă cuendá cue espíritú xínú cuèchi núú-gă, te ní cachí-gă:

Yúhú quidè-í sá ncháá cuè espíritú xínú cuèchi núú-í cúú-xí dàtná táchí,

te ñu-ni cue espíritú-án quidè-í sá cúú-xí dàtná itá ñuhú.

Duha cächí-gă.

⁸ Dico Déhe-gá chi ñá túú dùcaⁿ ni xáhaⁿ-gă, chi duha ní xáhaⁿ-gă:

Yòhó tnàhá-n cùu-n Ndióxí dàtná cúú yúhú Yáá cúú Tătá-n,

te ducaⁿ-ni tàxi tnuní-n ñi caa ni quíhíⁿ,

te ío váha ndáá quidé-n tàxi tnuní-n.

⁹ Te dàquee tihú-n ncháa sá cuèhé sá dúhá, te cùu iní-n ncháa sá váha,

núu xíáⁿ yúhú Yáá cúú Tătá-n ñi quide-í sá ïo-gá vii ío-gá váha cuu iní-n,

dàcúúxí nchàa dava-gá ñáyiú ndècu ndìhi-n.

Duha ní xáhaⁿ-gă xii Déhe-gá.

¹⁰ Te ní xáhaⁿ tùcu Yá Ndiöxí xii Déhe-gá:

Yòhó cúú-n Yàá ío cùnuu, chi ndéé cútnàhá ñá túú vèdana ná ío te ní cadúha-n ñùyíú ndìhi andìu.

¹¹ Te andìu ndìhi ñùyíú chi naa-xi, dico yòhó chi cundecu-ni-n nì caa nì quíhíⁿ.

Te andìu ndìhi ñùyíú chi ndìhi-xi dàtná ndíhí ìⁿ dóó,

¹² te dàtná cuíní-n quède ñáyiú ndìhi ìⁿ dóó òré ndàcáⁿ tnáhnǔ-yu tàxi ndecú-yu ìⁿ xio, ducaⁿ càda-n ñùyíú ndìhi andìu,

te dàtná nádăma dóó ñáyiú ducaⁿ càda tucu-n ñùyíú ndìhi andìu.

Te yòhó dàtná-ni càa-n ndecu-n vitna ducaⁿ-ni cùnduu-n cundecu-n nì caa nì quíhíⁿ, chi vá yíí tnàhí-n.

Duha ní xáhaⁿ Yă Ndiöxí xii Déhe-gá.

¹³ Te Yá Ndiöxí ñá túú ní xăhaⁿ-gă xii nì ìⁿ cue espíritú xínú cuèchi núú-gă dàtná ní xáhaⁿ-gă xii Déhe-gá, te duha ní xáhaⁿ tùcu-gá:

Ngóo xio cùha-í taxi tnùní-n,

te yúhú cada-í te nchaa sá cúú ùhú iní ñáhá xì-n canehe-xi sá yíñùhu núú-n.

Duha ní xáhaⁿ-gă xii Déhe-gá.

¹⁴ Te nchaa espíritú xínú cuèchi núú Yă Ndiöxí mee-ni chìuⁿ-gá quidé-xí, chi tëndaha-gá cue espíritú-án cuăháⁿ-xi nchaa núú ndécú cue ñáyiú ní nduu táhú cundecu ndìhi-gá chindee ñàha-xi xí-yu.

2

Vá dáñá ndèé-ó tnũhu sá càháⁿ nàcuáa naníhí tãhú-ó

¹ Te sá cuendá sá ïo cùnuu Xítóhó Jesucrístú, núu xíãⁿ ío xìni ñuhu-xí cada cuendá-ó nchaa tnúhu càháⁿ-gá sá sà ní xíndedóho-o cuendá sá vã dáñá ñihnu-o.

² Te cue espíritú xínú cuèchi núú Yã Ndiõxí ní càháⁿ-xí tnúhu-gá ndéé sanaha, te tnúhu ní càháⁿ cue espíritú-án cúú-xí sã ndáa cuíti. Te nchaa ñáyiu ñá túú ní cuení tnĩ nchaa tnúhu ní càháⁿ cue espíritú-án, te ni ñà túú ní cuení-yu cundedóho-yu, nchaa ñáyiu-án ñĩ nacháhu-yu nàcuáa ndùu nchaa cuèchi ní quidé-yu ñⁿ ñⁿ-yu.

³ Te sá dúcáⁿ ñĩ yáha cue ñáyiu-án, xíãⁿ cútnùní ndáá iní-ó sã vã càcu ñihnu-o te núu na dàña ñihnu-o tnúhu sá càháⁿ nàcuáa naníhí tãhú-ó, tnúhu sá ïo cùnuu, chi nacháhu-o te núu ducaⁿ na càda-o. Te díhna-gá Xítóhó Jesucrístú ní càháⁿ-gá tnúhu-án te nchaa ñáyiu ní xíndedóho nchaa nàcuáa ndùu tnúhu-án ñĩ càháⁿ ndáá-yu tnúhu-án nũú-ó.

⁴ Te tnàhá Yã Ndiõxí cúndìhi-gá nchaa ñáyiu-án quidé-gã nàcuáa cutnùní iní-ó sã tnũhu-án cúú-xí tnũhu ndáá, chi quide-gá titní núú sã vã yõ tnàhí ndàcu cada te ío cùñúhu-o. Te Espíritú Yã Ndiõxí quidé-xí nàcuáa nduu táhú-ó ndĩ díⁿ nũú chiⁿ cada-o nacuáa cuení méé-gã. Te sá dúcáⁿ quide Yá Ndiõxí nchaa xíãⁿ, xíãⁿ cútnùní iní-ó sã tnàhá-gá càháⁿ-gá sá tnũhu-án cúú-xí tnũhu ndáá.

Xítóhó Jesucrístú ní xínduu yiqui cùñú-gá dàtná cáá yiqui cuñú nchoo cuè ñáyiu ñuyúú-a

⁵ Te Yá Ndiöxí vá táxí ndècu-gá cue espíritú xínú cuèchi núú-gă taxi tnùní-xi ñuyíú sáá sã vátá quíní-gá-ó, te ðiu cuendá xíăⁿ cãháⁿ-í.

⁶ Te núú tùtú Yă Ndiöxí cãchí-xi:
Yòhó Dútú Ndiöxí ñá túú nã cuú cuè ñáyiu ñuyíú nũu ndacu iní-n-yu, àdi chindeé-n-yu.

⁷ Te yòhó ní cachí-n sã nchàa ñáyiu ñuyíú-a vá cúnùú-yu dàtná cúnùu cue espíritú xínú cuèchi núú-n,
dico ní cachí-n sã sàá nduu te ío cunùú-yu tnàhá-yu, te mee-n cãháⁿ-n sã ïo cãhnu cuú-yu,
te ní cachí tucu-n sã táxí tnùní-yu nchaa sá ñí cadúha-n.

⁸ Te ducaⁿ nchàandi túhú sá ío quíndàhá-yu.
Duha cãchí-xi núú tùtú-gá. Te sá dúcáⁿ ñí cachí Yă Ndiöxí sá quíndàha ñáyiu ñuyíú nchaa sá ío, xíăⁿ cútnùní sá ncháándì túhú sá ío taxi tnùní-yu, dico vátá sàá-gá nduu dùcaⁿ quíní-ó càda-xi.

⁹ Te nchoo sa nàha-o sá tnáá-ní ñí quide Yá Ndiöxí cuendá sá vã cúnùu Xítóhó Jesucristú dàtná cúnùu cue espíritú xínú cuèchi núú-gă. Te ducaⁿ ñí quide Yá Ndiöxí chi ní cundàhú iní-gá nchaa ñáyiu ñuyíú-a, chi ní cachí-gá sá Dêhe-gá cuú cuendá ncháá-yu, te Xítóhó Jesucristú ío ní ndoho-gá òré ní xíhí-gá, núu xíăⁿ ní nduu táhú-gă cúnùu vihi-gá vitna. Te mee Yă Ndiöxí cãchí-gá sá ïo cãhnu cuu Dêhe-gá.

¹⁰ Te Yá Ndiöxí ní cadúha-gá nchãandi túhú sá ío nàcuáa ní cachí iní méé-gă, te sá dúcáⁿ ñí quide-gá nũu xíăⁿ váha-ni sá ñí cachí-gá sá Xítóhó Jesucristú nándi ndoho-gá te cuú-gá cuendá ducaⁿ ñã túú tnàhí-gá ná cùmání-gă núú Yă Ndiöxí. Te sá dúcáⁿ

nĩ cuu núu xĩáⁿ ní níhí Yă Ndiöxí nàcuáa cada-gá cãndeca-gá nchaa ñáyiu cùu déhe-gá quíhíⁿ núú ïo váha cãa cundecú-yu ndihí-gá ni caa ni quíhíⁿ. Te Xítohó Jesucristú cúú-gă Yaá ní quide nàcuáa nduu táhú cue ñáyiu cundecú-yu ndihí Yá Ndiöxí.

¹¹ Te Xítohó Jesucristú cúú-gă Yaá quidé ndècu yiñuhu ñáyiu núú Yă Ndiöxí ñáyiu sãndáá iní ñáhá xii-gá, te Xítohó Jesucristú ndihí cue ñáyiu-áⁿ ñⁿ-ni Yáá cúú Tătã-yu ndihí-gá, núu xĩáⁿ Xítohó Jesucristú Yaá cúú Dêhe Dútú Ndiöxí ñá túú cùcahaⁿ núú-gă cãháⁿ-gá sá ñãní-gá ndihí cùha-gá cúú nchãa ñáyiu-áⁿ.

¹² Te quèe ndáá-xi nàcuáa cãháⁿ-xi núú tütú Yă Ndiöxí núú cãchí-xi nàcuáa ní xáhaⁿ Xítohó Jesucristú xii Tătã-gă Dútú Ndiöxí, te duha ní xáhaⁿ-gă: Cãháⁿ váha-í cuendá-n núú nchãa cue tée cùu datná ñãní-í ndihí núú nchãa cue ñáyiu ðihí cúú datná cùha-í,

te cata-í ndudú chiñuhu ñaha-ï xii-n núú tàcã-yu. Duha yòdo tnuní núú tütú-gá nàcuáa ní xáhaⁿ Dêhe-gá xii-gá.

¹³ Te ñgã tucu xichi núú tütú Yă Ndiöxí cãháⁿ-xi nàcuáa ní cãháⁿ Xítohó Jesucristú cuendá-gá, te duha ní cachí-gá:

Yúhú nchaa-ni nduu quindáá iní-í Tătã-í Dútú Ndiöxí.

Duha cãchí-xi núú tütú Yă Ndiöxí nàcuáa ní cãháⁿ Xítohó Jesucristú. Te ñgã tucu xichi núú tütú Yă Ndiöxí cãháⁿ-xi nàcuáa ní cãháⁿ tucu Xítohó Jesucristú, te duha ní cachí-gá:

Iha ndècu ndihí-í nchaa ñáyiu cùu déhe Tătã-í Dútú Ndiöxí, te ðiu-ni ñáyiu-áⁿ nĩ taxi cuendá Tătã-í cuu cuendá-í.

Duha càchí-xi núú tütú-gá nàcuáa ní cáháⁿ Xítóhó Jesucrìstú.

14 Te sá cuendá nchaa ñáyiú cùu déhe Yá Ndiöxí cúŷ-yu yiqui cùñú, núu xiǎⁿ ducaⁿ tnàhá Xítóhó Jesucrìstú ní cuu-gá yiqui cùñú, te ducaⁿ ñí cuu-gá yiqui cùñú cuendá cuú-gá, te sá dúcáⁿ cùú-gá te ndacu-gá daquèe tíhú-gă sácuihná, te diu sácuihná-ăⁿ quidé-xí xihí ñáyiú.

15 Te ducaⁿ ñí quide-gá cuendá sá cuè ñáyiú ñuyiú-a vá yùhú-gá-yu sá cùú-yu, chi nchaa-ni nduu yùhú-yu sá cùú-yu.

16 Te na càchí tnúhu ndáá-í sá Xítóhó Jesucrìstú ní quixi-gá cuendá chindee-gă cue ñáyiú cùu ñaní tnáhá ndi Ábrahám, te ñá díú cuendá sá chindèe-gá cue espíritú xínú cuèchi núú Yă Ndiöxí.

17 Te cuendá xiǎⁿ nŷu dai ní xini ñuhu-xi sá cúú-gă ñáyiú cuendá yăha-gá nándi sá yăha-gá dàtná yăha cue ñáyiú cùu ndi mee-gá cuendá ducaⁿ cùu-gá dútú İo cùnūu te cuu ndáá-gá núú Yă Ndiöxí, te cundàhú iní-gá nchaa ñáyiú te cuú-gá cuendá sá vă cundècu-gá cuéchi-yu núú Yă Ndiöxí.

18 Te mei òré ndóhó Xítóhó Jesucrìstú ní xito ndéé ñáhá sácuihná xii-gá te núu ndisa sá vă cáda-gă ni ìⁿ sá ñà túú tàú-gá cada-gá, te sá dúcáⁿ ñí ndoho-gá xiǎⁿ nŷu ndácú-gă chindèe-gá nchaa ñáyiú ducaⁿ yăha.

3

Xítóhó Jesucrìstú İo-gá cùnūu-gá dàcúxí ndi Moisés

¹ Te nchòhó cúú-ndó ñáyiú ndècu ndihi-í ichi Xítóhó Jesucrìstú ñáyiú cùu cuendá Yă Ndiöxí, te

tnàhá-ndó cùu-ndo ñáyiu ní cáháⁿ ñáhá-gă cuendá cundecu-ndo ndìhì-gă. Te yúhú càchí tnúhu-í xii-ndo sǎ ïo váha cada cuendá-ndó nàcuáa ndùu cuendá Xítohó Jesucristú, chí ñu-gă cúú-gă Yaá ní tendaha ñàha Dútú Ndiǒxí ní quixi-gă ñuyíú-a, te ñu-gă cúú-gă Dútú ïo cùnùu chí quide-gă núú Yǎ Ndiǒxí. Te ñu-ni cuendá Xítohó Jesucristú cáháⁿ tnúhu sá ni sàndáá iní-ó.

² Te mee Yǎ Ndiǒxí ní sáha chùuⁿ-gă Xítohó Jesucristú, te ïo ndáá quidé-gă chùuⁿ-áⁿ sǎ cúú-xí Yǎ Ndiǒxí, te ñu-ni ñucaⁿ ñí quide ndí Moisés ní quide ndí chùuⁿ ní táhú Yǎ Ndiǒxí, te ïo ndáá ní quide ndí chùuⁿ-gă sá cúú-xí nchàa ñáyiu cùu cuendá-gă, te cue ñáyiu-áⁿ cúú-yu dàtná vehe mee-gă.

³ Te ñíⁿ téé dàcaa ñíⁿ vehe váha ïo càhnu-gă cúú-dě dàcúúxí vèhe dácaa-dé. Te ñucaⁿ sǎtnahá-xi cùu Xítohó Jesucristú chí ïo-gă càhnu cuu-gă dàcúúxí ndí Moisés.

⁴ Te nchoo sà naha-o sá ncháá vèhe dacuití ndècu cue téé ní dácáá, dico sa naha tucu-o sá Yǎ Ndiǒxí quidé-gă ndécú nchàa sá ïo ñuyíú-a.

⁵ Te ndí Moisés-áⁿ ïo ndáá ní quide ndí chùuⁿ ní táhú Yǎ Ndiǒxí ní quide ndí sá cúú-xí nchàa ñáyiu cùu cuendá-gă. Te sá dúcáⁿ ñí quide ndí xíáⁿ ní cuu ndí ñíⁿ téé ní xinu cuechì núú Yǎ Ndiǒxí. Te ní xáhaⁿ ndí xii nchaa ñáyiu cùu cuendá-gă nàcuáa cáháⁿ-gă ndéé cuéé-gă.

⁶ Dico Xítohó Jesucristú cúú-gă Déhe mee Yǎ Ndiǒxí, te cùu-gă Yaá ïo quide ndáá yíndàha-gă nchaa ñáyiu cùu cuendá Yǎ Ndiǒxí. Te tnàhá-ó cùu-o ñáyiu cùu cuendá-gă, te ñu-ni ñucaⁿ cùu cuendá ñáhá-gă xii-o te núu na càncicúⁿ ni-

hnu-ni-o càni ndáá iní-ó cuèndá-gá ndéé ná sàá nduu ngũndecu-o ndihí-gá.

Cue ñáyiú cùu cuendá Yă Ndiöxí ío váha cùu iní-yu ndécú-yu ndihí-gá

⁷ Te núú tütú Yă Ndiöxí yódó tnùní nàcuáa ní cáháⁿ Espíritú-gá, te duha ní cachí-xi:

Te núu nchòhó ndèdóho-ndo nchàa tnúhu càháⁿ Yă Ndiöxí vitna,

⁸ te vá cùndùu sáá iní-ndó dàtná ní xínduu sàá iní ñáyiú ní dáquée tíhú tnúhu Yá Ndiöxí, ñáyiú ní xíndecu xití yucu,

chi ñáyiú-áⁿ ñí xito ndeé-yu Yá Ndiöxí núu nása cada ñaha-gă xií-yu.

Duha ní cachí Espíritú-gá.

⁹ Te càchí tucu Espíritú Yă Ndiöxí nàcuáa ní cáháⁿ méé-gă, te duha ní cachí-gá:

Xití yucu ní xito ndéé ñáhá cuè ñani tnáhá-ndó ñí xíndecu ndéé sanaha xì-í,

te ducaⁿ ñí quide ñàhá-yu cuèi ní xiní-yu nchaa sá ñí quide-í ndi ùdico cuíá ñí xíndecú-yu xití yucu-áⁿ.

¹⁰ Te sá dúcáⁿ ñí quidé-yu núu xíăⁿ ní cudéeⁿ-í núŭ-yu,

núu xíăⁿ ní cáháⁿ-í cuèndá-yu, te ní cachí-í:

“Ñáyiú-a quide-ní-yu nchaa sá ñà túú tàú-yu cadá-yu te ni ñà túú cuiní-yu cadá-yu nchaa nàcuáa sàni iní-í,

te ni ñà túú cuiní-yu cadá-yu nàcuáa càháⁿ-í”, duha ní cáháⁿ-í cuèndá-yu.

¹¹ Te xíăⁿ núu ní cudéeⁿ-í núŭ-yu te ní xáhaⁿ ndăá-í xií-yu sá vă ndúú tãhŭ-yu cundecu váha-yu núú ndécú-í.

Duha ní cachí Yă Ndiöxí cächí Espíritú-gá.

¹² Te nchòhó ñáyiú ndècu ndihí-í ichi Xítohó Jesucristú, cáháⁿ-í dóho-ndo sã ïo cada cuendá-ndó vã cání cuèhé iní-ndó te ngóo-ndo vã quìndáá-gá iní-ndó Yă Ndiöxí te dañá-ndo ìchi-gá, te ñiu-gá cúú-gã Yaá ndécú nchàa nduu nchaa quíú.

¹³ Te ìⁿ nduu ìⁿ nduu ío chí cuãha tnàha tnúhu ndee iní cundecu-ndo ñini ndecu-ndo ñuyíú-a cuendá sá vã xĩnu iní-ndó càda-ndo nándi sá cuèhé sá dúhá, te ducaⁿ te vá cúú sáá iní-ndó núú Yă Ndiöxí.

¹⁴ Te vá dáñá ndèé-ó càni ndáá iní-ó nàcuáa cada ñaha Yă Ndiöxí xii-o, te dàtná-ni ní sani iní-ó ndèé cúnàhá ní tuha-o ìchi Yă Ndiöxí, te ñiu-ni ducaⁿ càni iní-ó ndèé ná sáá nduu vã cùndècu-gá-ó ñuyíú-a, te núú ducaⁿ na càda-o te cùu ìⁿnuu-o ndihí Xítohó Jesucristú.

¹⁵ Te duha cáháⁿ-xi ìⁿ xichi núú tùtú Yă Ndiöxí:
Te núú nchòhó ndèdóho-ndo nàcuáa cáháⁿ Yă Ndiöxí vitna,

te vá cùndùu sáá iní-ndó dàtná ní xĩnduu sáá iní cue ñáyiú ní dáquéé tĩhú tnúhu-gá ndéé sanaha.
Duha cächí-xi núú tùtú-gá.

¹⁶ Te cue ñáyiú ducaⁿ ñĩ xĩnduu sáá iní-xi cùú-yu ñáyiú ní ndeñuhu ndí Moisés nacióⁿ Ègiptú, te ñáyiú-áⁿ ñĩ xĩndedóho-yu tnúhu ní cáháⁿ Yă Ndiöxí te ní quide sáá iní-yu ní dáquéé tĩhũ-yu tnúhu-gá.

¹⁷ Te ndi ùdico cuíá ñĩ xúhuⁿ-yu ichi ío ní cùdééⁿ Yă Ndiöxí núũ-yu cuendá sá ñĩ quidé-yu nándi nchaa sá cuèhé sá dúhá, te ñáyiú-áⁿ ñĩ xíhí-yu xití yucu.

¹⁸ Te nchaa ñáyiú-áⁿ ñà túú ní cuíní-yu tní-yu tnúhu ní cáháⁿ Yă Ndiöxí núu xíãⁿ ní cáháⁿ ndáá-gá

sá vǎ ndúú tǎhǔ-yu cundecú-yu núú ïo váha càa ndecu-gá.

¹⁹ Te xǎⁿ nǔu nchoo cùtnuní iní-ó sǎ nchàa ñáyiu-áⁿ ñà túú ní ndùu tǎhǔ-yu cundecu váha-yu núú ndécú-gǎ, chi ñǎ túú ní sàndáá iní-yu tnúhu ní cáháⁿ-gá.

4

¹ Te vitna ndècu ndihi-gá-ó tnúhu Yá Ndiǒxí tnúhu sá dánèhé ñáhá xii-o sá cúú cùndecu váha-o nǔú ndécú-gǎ, te tàú-xi quiyùhú iní-ó chi na cuáháⁿ te vǎ ndúú tǎhú-ó cùndecu váha-o nǔú ndécú-gǎ.

² Te tnáhá nchoo nǐ ngúndecu ndihi-o tnúhu sá càháⁿ nàcuáa naníhí tǎhú-ó dàtná ní xíndecu ndihi cue ñáyiu ndéé sanaha, dico ñáyiu-áⁿ chi ñǎ túú vèdana ni nàndíhi-xi cuèi ní xíndedóho-yu tnúhu-áⁿ chi ñǎ túú ní sàndáá iní ñáhǎ-yu xii-gá.

³ Dico nchoo cùu-o ñáyiu ní sàndáá iní tnúhu Yá Ndiǒxí, núu xǎⁿ nduu tǎhú-ó cùndecu váha-o nǔú ndécú-gǎ, te ní quee ndáá-xi nàcuáa càháⁿ-gá núú tütú-gá núú càchí-xi:

Yúhú ní cudèèⁿ-í nǔú-yu, te ní cáháⁿ ndáá-í sá vǎ ndúú tǎhǔ-yu cundecu váha-yu núú ndécù-í.

Duha ní cachí-gá. Te cuu nduu tǎhǔ-yu cundecu váha-yu núú ndécú Yǎ Ndiǒxí ní cùu, chi sa ní xínu cava nchaa chiuⁿ ní quide-gá sá nǐ cadúha-gá ñuyú.

⁴ Te núú tütú Yǎ Ndiǒxí càháⁿ-xi nàcuáa ní quide-gá nduu úsá, te duha càchí-xi:

Yá Ndiǒxí ní quide chiuⁿ-gá ínú nduu ní quide-gá nchaa chiuⁿ-gá te ní ndetatú-gá nduu úsá.

Duha càchí-xi núú tùtú-gá.

⁵ Te càchí tucu-xi núú tùtú Yă Ndiöxí nàcuáa ní cáháⁿ-gá cuendá cue ñáyiú ndéé sanaha, te duha ní cachí-gá:

Cue ñáyiú-a vá ndúú tǎhǔ-yu cundecu váha-yu núú ndécù-í ndétàtú-í.

Duha ní cachí-gá.

⁶ Te ñáyiú ní xíndedóho tnúhu sá cǎháⁿ nàcuáa naníhí tǎhú-ó ndéé sanaha, ñá túú ní ndùu tǎhǔ-yu cundecu váha-yu núú ndécú Yă Ndiöxí ndétàtú-gá, te ducaⁿ chi ñá túú ní sǎndáá iní ñáhǎ-yu xii-gá, dico ìó-gá ñáyiú nduu táhú cundecu váha núú ndécú-gǎ ndétàtú-gá.

⁷ Te ní xica cuéhé nduu sá dúcáⁿ ñà túú ní sǎndáá iní ñáhá ñáyiú-áⁿ xii-gá, te dǎtnùní ní cáháⁿ ndíi Dàvíí yuhu-gá nàcuáa cada-gá vitna, te ñiú-ni nàcuáa sa yòdo tnuní ñiú-ni ducaⁿ chido tnuní tucu-í nàcuáa ní cáháⁿ ndíi yuhu-gá, te duha ní cachí-gá:

Te núu nchòhó ndèdóho-ndo tnúhu cǎháⁿ-í te vá cádá sǎá iní-ndó.

Duha ní cachí-gá.

⁸ Te ndíi Jòsué ní sanu ichi ndíi ñáyiú núú quíhíⁿ-yu cundecu váha-yu, dico ñá díú cuendá xǎⁿ ní cǎháⁿ Yă Ndiöxí, chi cuendá nàcuáa cada-gá vitna ní cáháⁿ-gá.

⁹ Núu xǎⁿ sǎá nduu ndùu táhú nchaa ñáyiú cùu cuendá Yă Ndiöxí ngúndecu váha-yu núú ndécú-gǎ ndétàtú-gá.

¹⁰ Te nchaa ñáyiú ducaⁿ na ndùu táhú cundecu váha núú ndécú Yă Ndiöxí ndétàtú-gá, te tnàhá-yu ndetátú-yu cuendá nchaa sá vǎha ní quidé-yu dàtná ndétàtú méé-gǎ.

11 Te xini ñuhu-xi sá nchóó ïo nducu ndè-o nducu-o nacuáa cada-o cuendá nduu táhú-ó ngündecu váha-o núú ndécú Yá Ndiöxí ndétátú-gá, chi na cuáháⁿ dava-ndo càda-ndo datná ní quide cue ñáyiú ñá túú ní sàndáá iní ñáhá xii-gá, te vá ndúú táhú-ndó cùndecu váha-ndo núú ndécú-gã te núú ducaⁿ na càda-ndo.

12 Te tnúhu Yá Ndiöxí cúu-xí dàtná ìⁿ sá nchító-ó chi quide-xi nándi sá quidé-xí, te cùu-xi datná ìⁿ sá dëéⁿ víhí-gã dàcúúxí ìⁿ yuchí sá ndèé úú xio núú-xi. Te ducaⁿ sãtnahá-xi cùu tnúhu-gá chi quée-xi iní-ó, te dàndixi túu-xi nchaandi túhú sá sání iní-ó te núu quide váha-o àdi ñá túú quide váha-o ndècu-o.

13 Te ni ìⁿ sá ñí cadúha Yá Ndiöxí vá cáni iní-ó sã ndácú-xí nguiváha-xi núú-gã, chi nchaandi túhú sá sání iní-ó ndècu túu-xi núú-gã, te ñiú núú Yàá-áⁿ na càni cuendá-ó nchàa sá quidé-ó.

Xítohó Jesucristú cúu-gã Dútú ïo cùnuu

14 Te Xítohó Jesucristú cúu-gã Dútú ïo cùnuu ndecu ndihi-o, te ñiú-gá cúu-gã Déhe Dútú Ndiöxí, te Yáá-áⁿ cuãndaa-gá andiú ñí nucúndecu-gá núú Yá Ndiöxí, núu xíãⁿ tàú-xi sá cáncñicúⁿ nihnu-ni-o quèndáá iní-ó-gã.

15 Te mee Yáá-áⁿ ïo cùnuu-gá cúu-gã dútú-ó ndècu ndihi-o, te ío na cùndahú iní ñáhá-gã xii-o cuendá sá ñá ñihí ndéé-ó cùndecu-o. Te ducaⁿ càda-gá chi ní yáha-gá dàtná yãha mee-o, chi nchaa sá ñí yáha-gá-áⁿ ñí cuu-xi sá cádá-gã nándi nchaa sá cuèhé sá dúhá ní cùu dico ni ìⁿ ñá túú ní quide-gã.

16 Núu xíãⁿ tàú-ó sã nchóó ñí yuhu ñí iní-ó cãháⁿ ndihi-o Yá Ndiöxí Yáá ío cùndahú iní ñáhá xii-o chindee ñaha-gá, te ducaⁿ càda-o te cundàhú iní

ñáhá-gă chindee ñàha-gá xii-o nděda-ni càa oré xíní ñùhu-o-gá.

5

¹ Te nchaa cue dútú cúnùu núú ñăyiu isràél ñiu-ni ñăyiu cùu-güedé, te ducaⁿ ñí ngúndecu-güedé cuendá cada-güedé chiⁿ sá cúu-xí Yă Ndiöxí cuendá-yu, chi ñiu cue téé-áⁿ ñí xóo nacani cuendá-güedé núú-gă quiti ní xóo cahni-güedé ní xóo nduu táhú-gă, te ducaⁿ ñí xóo cada-güedé cuendá sá cadá càhnu iní Yă Ndiöxí cuéchi-yu, te ducaⁿ ñí xóo nacani cuendá tucu-güedé núú-gă nchaa dava-gá sá ñí xóo níhí-güedé ní xóo nduu táhú-gă.

² Te nchaa cue dútú-ăⁿ ñí xóo cundee ìní-güedé nchaa sá ñí xóo cada nchaa ñăyiu ñá túú ní quide ndáá ñăyiu ñá túú cùtnuní iní-xi, te ducaⁿ ñí xóo cada cue dútú-ăⁿ chi tñáhá-güedé ñá túú ní xóo níhí ndéé-güedé cundecu-güedé cuendá nchaa sá ñí xóo yáha-güedé.

³ Te sá cuendá sá dúcáⁿ ñà túú ní xóo níhí ndéé-güedé nùu xiáⁿ dai ní xini ñùhu-xi sá tñáhá-güedé cuáha-güedé Yă Ndiöxí sá ndúú táhú-gă cuendá mée-güedé dàtná quidé-güedé cuendá ñăyiu.

⁴ Te ni ìⁿ téé vá ndácú-dě cuu-dé dútú cúnùu cuendá-ni sá càchí iní mée-dě te núu ñá díú mèe Yă Ndiöxí ducaⁿ cuini-gá sá cúu-dě dútú cúnùu datná ní quide-gá ndíi Àrón.

⁵ Te cuéi Xitohó Jesucrìstú chi ñá díú mèe-gá ní quide-gá mée-gă ìⁿ dútú cúnùu nacuáa cada nínu-gá mée-gă, chi mee Tătá-gă Dútú Ndiöxí

ducaⁿ ñ cachí-gá sá cúú-gă Dútú cúnùu, te ducaⁿ chi Yá Ndiöxí ní xáhaⁿ-gă:

Yòhó cúú-n Dêhe-í,

te cuení-í sá dúhá-ní cùndecu-n núú ndécù-í.

Duha ní xáhaⁿ-gă xii Xítohó Jesucrìstú.

⁶ Te núú tùtú Yá Ndiöxí yódó tnùnì nàcuáa ní xáhaⁿ tùcu-gá xii Xítohó Jesucrìstú, te duha ní xáhaⁿ-gă:

Yòhó cúú-n dütú cundecu ni caa ni quíhíⁿ,

te cùu-n datná ní cuu ndí Melquisèdec.

Duha ní xáhaⁿ-gă xii Xítohó Jesucrìstú.

⁷ Te cùtnàhá ní xíndecu Xítohó Jesucrìstú ñuyíú-a te níhi ní xóo cáháⁿ ndihi-gá Yá Ndiöxí te ní xóo cáháⁿ ndàhú-gá núú-gă, te ní xóo ndáhyú-gá òré ducaⁿ ñ xóo cáháⁿ ndihi-gá Yá Ndiöxí, te ducaⁿ ñ quide-gá chi ñaha-gá sá Yá Ndiöxí cúú-gă Yaá ndacu dàcácu nihnu ñaha xii-gá cuèndá sá vă cùú dúcáⁿ-gă. Te Yá Ndiöxí ní xíndedóho-gá nchaa tnúhu ní cáháⁿ Xítohó Jesucrìstú cuèndá sá ñ quide-gá nchaa nàcuáa ní xáhaⁿ Yá Ndiöxí cada-gá.

⁸ Te sá cuèndá nchaa sá ñ ndoho Xítohó Jesucrìstú xíáⁿ ní cutnùnì iní-gá cada-gá nchaa dava-gá sá vâha nàcuáa cuení méé Yá Ndiöxí cada-gá. Te ducaⁿ ñ cuu cuèi cùu-gă Déhe Yá Ndiöxí.

⁹ Te sá dúcáⁿ ñ quide-gá nchaa nàcuáa cuení méé Yá Ndiöxí, xíáⁿ nûu vitna cùu-gă Yaá dácăcu nihnu nchaa ñáyiú sàndáá iní ñáhá xii-gá núú ùhú núú ndàhú.

¹⁰ Te mee Yá Ndiöxí ní cachí-gá sá Xítohó Jesucrìstú cúú-gă dütú cúnùu datná ní cunuu ndí Melquisèdec cùtnàhá ní cuu ndí dütú ñuyíú-a.

Cuèndá ñáyiú cuení dañá nihnu ichi Yá Ndiöxí

11 Te vâi-gá tnúhu ndècu cáháⁿ-í nàcuáa ndùu cuendá Xítohó Jesucristú, ndihí ndíi Melquisèdec, te dícó-ni sá nchòhó ío cuèé tècú tnùnì-ndó, te yúhú ío úhú nihí-í nàcuáa cáháⁿ-í nàcuáa tecú tnùnì-ndó.

12 Te nchòhó sa ní cuu cuéhé nduu ndècu-ndo ichi Xítohó Jesucristú, te tàú-ndó dānehé-ndó cuè ñáiyu ndècu ichi-gá tnúhu-gá nũu dícó sá cúú, dico xìni ñuhu-ni-xi sá cúndècu ñáiyu danèhé ñáhá tnũhu-gá xii-ndo, tnúhu sá ñí dācuáhá-ndó ndéé díhna sá ñà túú ũhú tecú tnùnì-ndó. Te sá dúcáⁿ quìde-ndo núu xíáⁿ cúú-ndó dàtná cue landú vitna sàdi camá, landú vátá cúú-gă caxi dítá.

13 Chi nchaa ñáiyu cùu datná landú vitna sàdi, ñáiyu-áⁿ cúú nèñuú-yu ñá túú cùtnuní iní-yu nàcuáa càháⁿ tnúhu sá càháⁿ nàcuáa cada ndáá-yu cundecú-yu.

14 Te nchaa sá vátá cúú-gă caxi cue landú yíquíⁿ xíáⁿ cúú-xí cuendá cue ñáiyu sacuéhé, te xíáⁿ cúú-xí dàtná tnúhu sá dācuàha ñáiyu sa ní nihí ndéé ndècu ichi-gá, ñáiyu sa ní cutnùnì váha iní-xi nándi cùu nchaa sá cuéhé sá dúhá, ndihí nándi cùu nchaa sá vâha.

6

1 Te xíáⁿ nũu vitna xìni ñuhu-xi dacuaha-o dava-gá tnúhu Yá Ndiòxí cuendá ducaⁿ te cuu-o ñáiyu tècú tnùnì nchaa tnúhu-gá. Te xìni ñuhu-xi sá ncháá tnũhu Xítohó Jesucristú sá ñí dācuáhá-ó ndéé díhna vá dācuàha-gá-ó dàtná ní dācuáhá-ó chi sa tècú tnùnì-ó. Te ñá túú-gă xíní ñuhu-xi dacuaha-o datná ní dācuáhá-ó ndéé díhna nàcuáa cada-o ndìxi cuéchi iní-ó cuendá nchaa sá cuéhé sá dúhá quìde-o, sá tá dàcuíta nihnu ñaha xìi-o cuáháⁿ ní cùu. Te ducaⁿ vâ dācuàha-gá tucu-o dàtná ní

dácuáhá-ó ndèé díhna nàcuáa cada-o quìndáá iní-ó Yă Ndiöxí,

² ndihi cuëndá nàcuáa ní dácuáhá-ó nàcuáa cuandute-o, ndihi cuëndá nàcuáa cada-o càcáⁿ ndodo-o ndàha-o díquí ñáyiu ní sándáá iní ñáhá xii-gá. Te ducaⁿ ñà túú-gă xíní ñùhu tucu-xi dacuaha-o datná ní dácuáhá-ó ndèé díhna cuëndá nàcuáa ndoto cue ñáyiu ní xíhí, ndihi cuëndá nàcuáa ní dácuáhá-ó sǎ Yă Ndiöxí daquihíⁿ-gá ñáyiu núú ùhú núú ndàhú ni caa ni quíhíⁿ.

³ Te núu Yă Ndiöxí ná càchí-gá, te cuita dacuàha-gá-ó nchàa dava-gá tnúhu sá cúmăní quíhíⁿ.

⁴ Te cue ñáyiu sa tècú tnùní tnúhu Yă Ndiöxí, ñáyiu sa xíní nchaa nàcuáa ndùu nchaa sá vǎha quide ñaha Yă Ndiöxí xii-o ndihí-yu, ñáyiu sa chindee ñaha Espíritú Yă Ndiöxí,

⁵ ñáyiu sa cùtnuní iní-xi sá ïo vǎha tnúhu Yă Ndiöxí, ñáyiu sa xíní nàcuáa ta quide Yă Ndiöxí véxi nchaa sá vǎ yǒo tnàhí ndàcu cada,

⁶ te núu ñáyiu-áⁿ ná ngüita tucú-yu daquèe tíhú duúⁿ-yu tnúhu Yă Ndiöxí, te vǎ ndácú-gă-ó nà canu ichi-ó-yu nàcuáa ndixi cuéchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùú-yu dàtná cue téé ní sahani ñaha xii Xítóhó Jesucristú Déhe Yă Ndiöxí núú cùrúxí. Te sá dúcáⁿ ná càdá-yu te ngóo dava-gá ñáyiu cáháⁿ cuèhé-yu cuëndá Xítóhó Jesucristú.

⁷ Te nchaa ñáyiu cùú-yu dàtná ñuhu, chi ñuhu-áⁿ ndi tnahá òré cúúⁿ dǎu te xihí-xi ndute, te dava ñuhu vǎha cùu sá xítú ñáyiu, te sá cúú núú ñuhu-áⁿ ïo nàndíhi-xi, te mee Yă Ndiöxí quidé-gă cúú sǎ vǎha

núú ñúhú-ǎⁿ.

⁸ Dico núú da iñu na ndàa núú ñuhu-áⁿ te ñá túú vèdana nàndíhi-xi te núú ducaⁿ, te Yá Ndiöxí vá cúú vǎha iní-gá cuèndá ñuhu-áⁿ sǎ dúcáⁿ dà iñu ndaa núú-xi, te iñu-áⁿ ndíhi-xi cáyú. Te ducaⁿ sǎtnahá-xi cùu ñáyiú dàquee tíhú tnùhu Yá Ndiöxí chi ñá túú cùu váha iní-gá núú-yu.

Níhí-ó sǎ ndétú-ó ndùu táhú-ó

⁹ Te cuèi duha càháⁿ-í dico nchòhó cue ñáyiú ío cùu iní-í, chi cùnuní ndáá iní-í sá vǎ cáda-ndó dàtná xíquide dava-gá ñáyiú, te mee-ni sǎ vǎha cuu xii-ndo chi cùu-ndo ñáyiú sa ní naníhí tàhú.

¹⁰ Te ducaⁿ chi Yá Ndiöxí cúú-gǎ Yaá ío váha quíde ndáá, te vá dáná ndòdo iní-gá nchaa sá vǎha quíde-ndo, te ni vǎ dáná ndòdo iní-gá nàcuáa quíde-ndo cuu iní-ndó-gǎ, te sá dúcáⁿ quíde-ndo cuu iní-ndó-gǎ xiǎⁿ chíndèe-ndo cue ñáyiú ndècu ndíhi-ndo ichi Xítóhó Jesucristú, te ducaⁿ-ni ta quíde-ndo véxi ndéé vitna.

¹¹ Te cuìní-í sá ìⁿ ìⁿ-ndo nducu ndee-ndo cada-ndo nacuéa cuìní Yá Ndiöxí dàtná tá quíde-ndo véxi, te diu-ni ducaⁿ càda-ndo ndéé ná sàá nduu ndùu táhú-ndó cùndecu-ndo ndíhi-gá núú ndécú-gǎ, te ducaⁿ te níhí-ndó nchàandi túhú sá ndétú-ndó ndùu táhú-ndó cùndecu ndíhi-ndo ni caa ni quíhíⁿ.

¹² Te yúhú cuìní-í sá nchòhó vá tühío-ndo càda-ndo nchaa nacuéa cuìní Yá Ndiöxí, te cada-ndo dàtná quíde ñáyiú sàndáá iní tnùhu-gá, ñáyiú càhnu iní-xi. Te sá dúcáⁿ quíde-yu xiǎⁿ nihí-yu nchaa sá ñí cachí Yá Ndiöxí nduu táhú-yu.

¹³ Te cútnàhá ní xáhaⁿ Yá Ndiöxí xii ndíi Àbrahám nàcuáa cada-gá, te ní cacunehe-gá méé-gǎ nàcuáa

cutnùníní iní ndíí sá ndàá cada-gá nàcuáa ní xáhaⁿ-gã xii ndíí, te vá yõo ìⁿ ní càcunehe-gá cuèndá sá quíndáá iní ndíí tnúhu ní cáháⁿ-gá. Te ducaⁿ ñí quide-gá chi ìⁿdìi díí-ni mee-gã ío cùnuu-gá.

14 Te duha ní xáhaⁿ-gã xii ndíí Àbrahám: “Yòhó té Àbrahám na càchí tnúhu ndáá-í xii-n sã ìo chindee ñàha-í xii-n, te cáyá cuéhé víhí ñàní tnáhá-n”, duha ní xáhaⁿ-gã xii ndíí.

15 Te ndíí Àbrahám ío ní quide ndee ìní ndíí ní xíndetu ndíí, te ducaⁿ te Yá Ndiõxí ní quide-gá nàcuáa ní xáhaⁿ-gã cada-gá sá cúú-xí ndíí.

16 Te núu ìⁿ ñáyíu càháⁿ ìⁿ tnúhu ndáá cuiti te càcu nehé-yu Yá Ndiõxí cuèndá quíndáá iní tnàha ñáyíú-yu tnúhu càháⁿ-yu, te òré ducaⁿ na càháⁿ-yu te ñá túú-gã sá dácàá ñáyíu càháⁿ ndìhí-yu cuèndú.

17 Te ducaⁿ ñí quide Yá Ndiõxí ní cáháⁿ ndáá-gá sá cádá-gã nàcuáa ní cachí-gá, te ducaⁿ ñí cáháⁿ-gá cuèndá nchaa ñáyíu ní cachí-gá nduu táhú sã cádá-gã nàcuáa cutnùníní iní-yu sá quidé-gã ìⁿ sá càháⁿ-gá, te ni ñà túú nàdáma-gá ìⁿ sá càháⁿ-gá.

18 Te nchoo ñí natuha-o Yá Ndiõxí cuèndá dàcácu nihnu ñaha-gã xii-o núú ùhú núú ndàhú, te ní níhí-ó tnúhu ndee ìní ndécú ndìhi-o cuèndá sá vã dáñá ndèé-ó cùndetu-o sáá nduu ndùu táhú-ó cùndecu-o ndìhi-gá. Te ducaⁿ ñí níhí-ó tnúhu ndee ìní chi Yá Ndiõxí ní cáháⁿ ndáá-gá sá cádá-gã nàcuáa ní cachí-gá, te ñá túú dandahú ñáhá-gã, te ni ñà túú nàdáma-gá ìⁿ sá ñí cachí-gá cada-gá.

19 Te tnúhu ndee ìní ndécú ndìhi-o xíãⁿ quidé-xí cùtnuníní ndáá iní-ó sã ndúú táhú-ó cùndecu-o ndìhi Yá Ndiõxí núú ndécú-gã, te ducaⁿ cùtnuníní ndáá ndisa iní-ó sã cuèndá Xítóhó Jesucristú Yáá ndécú

núú Yă Ndiöxí.

²⁰ Te ducaⁿ nĩ nucúndecu Xítóhó Jesucrístú núú Yă Ndiöxí cuendá ducaⁿ cànchicúⁿ nihnu-o càda-o, te ducaⁿ nĩ nucúndecu-gá núú Yă Ndiöxí chi cùu-gá dútú cúnùu datná ní cunuu ndíi Melquisèdec ñuyíú-a, te ducaⁿ-ni cùu-gá dútú cúnùu nĩ caa nĩ quíhíⁿ.

7

Xítóhó Jesucrístú cúu-gă dútú datná ní cuu ndíi Melquisèdec

¹ Te ndíi Melquisèdec ní xíndaha ndíi cue ñáyiú ñuú Sàlém, te ní cuu ndíi dútú nĩ xinu cuechi ndíi núú Dútú Ndiöxí Yaá ío cúnuu. Te ndíi Melquisèdec-áⁿ nĩ xícáⁿ táhú ndíi núú Yă Ndiöxí cuendá ndíi Àbrahám cútnàhá ní sáháⁿ ndíi Àbrahám-áⁿ nĩ nàá ndíi ndihĩ cue dava-gá cue téé yíndaha ñáyiú. Te cue téé-áⁿ ñà túú ní ndàcu-güedé nàá-güedé ndihĩ ndíi Àbrahám-áⁿ chi ní xíta-güedé.

² Te nchaa sá nĩ níhí ndíi Àbrahám-áⁿ núú nĩ nàá ndíi, te ní quide ndíi úxí xichi te ñⁿ xichi núú ùxí-áⁿ nĩ sáñaha ndíi xii ndíi Melquisèdec. Te dèu ndíi Melquisèdec-áⁿ quée-xí: Téé ío váha quide ndáá yíndàha ñaha xii ñáyiú, duha quèe-xi. Te ní xóo danàni ñahá-yu xii ndíi Téé yíndaha ñuú Sàlém, duha ní xóo danàni ñahá-yu. Te tnúhu Sàlém-áⁿ quée-xí: Ñúú ndécú nàhi, duha quèe-xi tnúhu-áⁿ. Núu xíãⁿ quée tucu-xi nacuáa nàni ndíi Téé yíndaha ñuú ndécú nàhi, duha quèe tucu-xi ñuú ndíi.

³ Te ñá túú tnúhu núu yoo cùu tátá ndíi ndihĩ náná ndíi, te nĩ ñà túú tnúhu núu yoo cùu xíi

ndïi ndihî xĩtná ndïi, te ni ñà túú tnũhu núu ná ndi cùu ñáyiu ní cuu ñaní tnáhá ndïi ní xíndecu ndéé sanaha-gă, te ni ñà túú tnũhu núu ná ama ní cacu ndíi, te ni ñà túú tnũhu núu ná ama ní xihí ndíi. Te ndíi-áⁿ ducaⁿ-ni ní cuu ndíi dútú ní xíndecu ndíi, te ducaⁿ sãtnahá-xi cùu Xitohó Jesucristú déhe Yá Ndiõxí chi cuu-gá dútú ni caa ni quihíⁿ.

⁴ Te vitna chí cuãha váha cuendá sá ndïi Melquisèdec ní cuu ndíi ìⁿ téé ío ní cuu càhnu ní xíndecu ñuyú-a, chi ndíi Àbrahám téé ní cuu ñaní tnáhá-ó ní xíndecu ndéé sanaha ní guide ndíi úxí xichi nchaa sá ní níhí ndíi núú ní náá ndíi. Te ìⁿ xichi núú ùxí-áⁿ ní sãñaha ndíi xii ndíi Melquisèdec.

⁵ Te ndíi Moisés ní chídó tnùní ndíi nàcuáa cada nchaa dútú, cue téé ní cuu ñaní tnáhá ndíi Leví sá cuè téé-áⁿ queheⁿ-güedé ìⁿ xichi núú ùxí xichi sá nihí cue ñáyiu isràél ñáyiu cùu ñaní tnáhá-güedé cuu cuendá-güedé. Te ducaⁿ guide-güedé cuèi ñaní tnáhá-güedé ndihî-yu ní cuu ndíi Àbrahám.

⁶ Te cuèi ñá díú ñàní tnáhá ndíi Melquisèdec cúú ndíi Àbrahám dico ní queheⁿ ndíi Melquisèdec-áⁿ ìⁿ xichi núú ùxí xichi nchaa sá ní níhí ndíi Àbrahám. Te ndíi Melquisèdec-áⁿ ní xicáⁿ táhú ndíi núú Yá Ndiõxí cuendá ndíi Àbrahám. Te diu-ni ndíi Àbrahám-áⁿ ní xáhaⁿ Yá Ndiõxí xii ndíi sá cáda vaha ñaha-gă xii ndíi.

⁷ Te sa cùtnuní iní-ó sã nõu ìⁿ téé na càcáⁿ táhú-dě núú Yá Ndiõxí cuendá ìⁿ ñáyiu, te téé-áⁿ cúnùu-gá-dé.

⁸ Te cue dútú ñáyiu isràél quéhéⁿ-güedé ìⁿ xichi núú ùxí xichi nchaa sá nihí-yu cùu cuendá-güedé, te cue téé-áⁿ cuú-güedé. Te núú tütú Yá Ndiõxí

càchí-xi sá ndïi Melquisèdec ndécú-ní ndïi, te ducaⁿ càháⁿ-xi chi ñá túú tnùhu sá ñí xíhí ndíi.

9-10 Te sá dúcáⁿ ñí sáñaha ndïi Àbrahám sá ñí nduu táhú ndïi Melquisedéc, te xiáⁿ cada iní-ó sã sà ndecu ndïhi ndíi Àbrahám cue ñaní tnáhá ndïi Lèví cue téé cùu dútú, cue téé quèheⁿ ìⁿ xi-chi núú ùxí xichi nchaa sá ñihí ñáyiú isràél cuèi vátá cécú-gã-güedé. Te cada iní-ó sã tnáhá-güedé ní sáha-güedé ndíi Melquisèdec ìⁿ xichi núú ùxí xichi nchaa sá ñí ñihí ndïi Àbrahám núú ñí nàá ndíi. Te ducaⁿ càda iní-ó chi cue téé-áⁿ cúu-güedé ñaní tnáhá ndïi Àbrahám cuèi vátá cécú-gã-güedé dàvá-áⁿ.

11 Te sá cuendá cue dútú cue téé cùu ñaní tnáhá ndïi Lèví ní ngúndecu ndïhi cue ñáyiú isràél tnúhu sá sánú ìchi ñaha xií-yu nàcuáa cadá-yu cundecú-yu. Te ñaní tnáhá ndïi Àrón cúu cuè dútú-áⁿ. Te núu dícó cue dútú-áⁿ ní ndàcu-güedé cada-güedé nàcuáa cudíu ñáyiú isràél núú Yá Ndiöxí, te ñá túú-gã xíní ñùhu-xi ngúndecu ìngá dútú dàtná ndíi Melquisèdec ní cùu. Te dútú-áⁿ ñà túú ní cùu-dé dàtná ní cuu cue ñaní tnáhá ndïi Àrón.

12 Te núú cuè dútú cue téé cùu ñaní tnáhá ndïi Lèví-áⁿ ñí ngúndecu ìngá dútú. Te sá dúcáⁿ ñí ngúndecu ìngá dútú xiáⁿ dacuítí ñí xini ñùhu-xi sá dâma nàcuáa ndùu tnúhu sá sánú ìchi ñaha xií-yu nàcuáa cadá-yu cundecú-yu.

13-14 Te diu-ni cuendá dútú-áⁿ sa ñihí-ó tnùhu, te dútú-áⁿ cúu Xitohó Jesucristú, te ñá díú ñàní tnáhá ndïi Àrón cúu-gã chi ñaní tnáhá ndïi Jùdá cúu-gã. Te nchaa-o tà xíní ndáá-ó sã ñàní tnáhá ndïi Jùdá cúu-gã, te ndíi Moisés ñá túú tnàhí ná ní càchí ndíi

cuendá cue ñaní tnáhá ndïi Jùdá sá cúu-güedě dútú, chi ni ñ-güedé ñá túú ní cùu-güedé dútú ní cùu.

15 Te vitna cùtnuní ndáá iní-ó nàcuáa ní cuu, chi Xítóhó Jesucristú cúu-gã ingá dútú dàtná ní cuu ndíi Melquisèdec.

16 Te ñá díú cuendá tnúhu sá sánú ìchi ñaha xii ñáyiú nàcuáa cadá-yu cundecú-yu ducaⁿ ni cùu-gá dútú, chi ní cuu-gá dútú cuendá sá cúu-gã Yaá cundecu ni caa ni quíhíⁿ chi vá ñⁿ ndùu te ndihi nihnu-gá.

17 Te duha ní xáhaⁿ Yã Ndiöxí xii-gá:

Yòhó cúu-n dütú dàtná ní cuu ndíi Melquisèdec,

te cundecu-n nchàa nduu nchaa quíú.

Duha ní xáhaⁿ Yã Ndiöxí xii-gá.

18 Te xíãⁿ nùu nchaa tnúhu ndéé díhna, tnúhu sá ñí xíndecu ndihi cue dútú ñà túú-gã cúnùu-xi vitna chi ñá túú-gã xíní ñùhu-xi te ni ñà túú ñá chíndèe ñaha-xi.

19 Te ñiú-ni tnúhu-áⁿ cúu-xí tnùhu sá ñí chídó tnùní ndíi Moisés canu ìchi ñaha xii ñáyiú nàcuáa cadá-yu cundecú-yu. Te tnúhu-áⁿ ñà túú vèdana ni quide-xi nacuáa chindee-xi ñáyiú cudíú-yu núú Yã Ndiöxí. Dico vitna ní ngúndecu ndihi-o tnùhu ndee ìní sá ño-gá váha dàcúúxí tnùhu ndéé díhna, chi ndècu ndihi-o Xítóhó Jesucristú Yaá cúu dütú-ó. Te Yaá-áⁿ quidé-gã tnàhá tnúhu-o ndihi Yá Ndiöxí vitna.

20 Te Yá Ndiöxí ní cáháⁿ ndáá cuiti-gá sá Xítóhó Jesucristú cuu-gá dútú.

21 Dico ñá túú dùcaⁿ ní cáháⁿ-gá cuendá cue ñaní tnáhá ndïi Lèví cue téé ní cuu dútú, cuèi mei òré ní chisaha-güedě ní cuu-güedé dútú. Te cútnàhá ní

chisaha Xítohó Jesucrìstú cúu-gã dùtú, te Yá Ndiöxí ní xáhaⁿ ndáá cuiti-gá xii-gá, te duha ní xáhaⁿ-gã:

Yúhú Dùtú Ndiöxí càháⁿ ndáá cuiti-í te vá dãmà-í tñúhu càháⁿ-í:

“Yòhó cúu-n dùtú dàtná ndí Melquisèdec,

te cundecu-n ñi caa ñi quíhíⁿ.”

Duha ní xáhaⁿ Yá Ndiöxí xii Xítohó Jesucrìstú.

²² Te Xítohó Jesucrìstú quidé-gã nàcuáa cutnùní ndáá iní-ó sã Yá Ndiöxí cada-gã ingá núú sã vãha sá cúu-xí-ó dàtná ní cachí-gá, te xiãⁿ cúu-xí sã ïo-gá váha dàcúxí tñúhu ní cáháⁿ-gã ndéé díhna.

²³ Te ío cuéhé cue ñaní tñáhá ndí Lèví ní cuu-güedé dùtú, te ducaⁿ cuendá sá ñà túú ní cùdí-güedé cundecu-güedé chi ní ndíhí-güedé ní xíhí.

²⁴ Dico Xítohó Jesucrìstú chi vá cùu-gá, chi cundecu-gá ñi caa ñi quíhíⁿ nñu xiãⁿ ñi-ni-gá cuu-gá dùtú, te vá yõ ñⁿ-gá cuu dùtú cada núú-gã.

²⁵ Te núu xiãⁿ Xítohó Jesucrìstú dácãcu nihnu ñaha-gã xii nchoo ñáyiú núú ùhú núú ndàhú, nchoo ñáyiú sàndáá iní ñáhá xii-gá, te ñi-ni nchoo cùu-o ñáyiú tñáhá tñúhu ndíhí Yá Ndiöxí, te vá ñⁿ ndùu-gá te cuíta nihnu-o. Te ducaⁿ chi Xítohó Jesucrìstú ñá túú xòcuíñí-gá núú Yá Ndiöxí càháⁿ ndàhú-gá cuendá-ó.

²⁶ Te Xítohó Jesucrìstú cúu-gã Yá cúu dùtú cùnùu xini ñuhu-o cundecu ndíhí-o, te ñi-gá cúu-gã Yá chíndèe chitúu ñaha xii-o, te cùu-gá Yá ío quide ndáá núú Yá Ndiöxí, te cùu-gá Yá cándò canine chi ñá túú tñáhí cuéchi-gá. Te ñá túú tñáhí quide-gá dàtná quidé nchàa cue ñáyiú ndècu ichi cuehé ichi duha, te cùu-gá Yá ní nucúndecu andíu núú ndécú Yá Ndiöxí te yácáⁿ táxí tñùní-gá.

27 Te ñá túú quide-gá dàtná ní quide cue dútú nǐ cunuu nǐ xíndecu, chi cue dútú-ǎⁿ ñⁿ nduu ñⁿ nduu ní xóo cahni-güedé quití ní xóo nduu táhú Yă Ndiöxí, te díhna-gá cuendá nchaa cuéchi mee-güedé ducaⁿ nǐ xóo cada-güedé te dătnùní ducaⁿ nǐ xóo cada tucu-güedé cuendá nchaa cuéchi ñáyiú. Dico Xítóhó Jesucrístú chi ñⁿ xito-ni ní xíhí-gá sá cúú-xí ncháa ñáyiú chi ducaⁿ nǐ sani iní-gá, te vá ñⁿ ndúu-gá ducaⁿ càda tucu-gá.

28 Te sá cuendá nchaa tnúhu ní chídó tnùní ndíi Moisés xíáⁿ ní xíndecu cue téé ní cuu dútú cúnùu, te cue téé-áⁿ nǐ cuu-güedé cue téé yíca cuéchi-xi. Te sátá dúcáⁿ nǐ chídó tnùní ndíi Moisés nàcuáa cada ñáyiú, te ní xica cuéhé víhí ndúu te dătnùní ní cáháⁿ ndáá cuítí Yă Ndiöxí sá Dêhe-gá cuu-gá dútú cúnùu. Te Yaá cúú Dêhe-gá-áⁿ nǐ quide-gá nchaa nàcuáa tàú-xi cunduu, te ñiú-ni ducaⁿ càda-gá ñi caa ñi quíhíⁿ.

8

Xítóhó Jesucrístú cúú-gă dútú cúnùu

1 Te Xítóhó Jesucrístú Yaá cúú dútú cúnùu ndecu ndíhi-o cuándaa-gá andíu, te ní ngóo-gá xio cùha Dútú Ndiöxí Yaá ío cúnúu, te tnàhá-gá cúnùu-gá. Te ñiú cuendá-a cùu-xi sá ño-gá cúnùu ta cáháⁿ-ndí véxi.

2 Te núú ndécú Yă Ndiöxí cúú-xí nǔú ñí víhí. Te cada iní-ó sǎ cúú-xí ñⁿ vehe te xíáⁿ ndécú Xítóhó Jesucrístú cúú-gă dútú, te vehe-áⁿ nǐ dácáá mée Yă Ndiöxí te ñá díú cuè téé ñuyíú-a.

3 Te sá cuendá nchaa tnúhu ní chídó tnùní ndíi Moisés xíáⁿ ní xíndecu cue dútú cúnùu cuendá sá cáhni-güedé quití nduu táhú Yă Ndiöxí, te nacani

cuendá-güedé núú-gă nchaa dava-gá sá nìhí-güedé nduu táhú-gă. Te xíáⁿ nũu dai ní xini ñuhu-xi sá tnàhá Xítohó Jesucrístú cuañaha-gă ìⁿ sá ndúú táhú Yă Ndiöxí, te táhú-ăⁿ cúú-xí mée-gá chi ní xíhí-gá ní cuu-gá dàtná ìⁿ táhú sã cúú-xí Yă Ndiöxí.

⁴ Te núu ni xĩndecu-ni Xítohó Jesucrístú ñuyíú-a te vá cúú-gă dútú ní cùu, chi sa ndècu cue dútú sãñaha nchàa sá ndúú táhú Yă Ndiöxí dàtná càháⁿ nchaa tnúhu ní chídó tnùni ndíi Moisés.

⁵ Te nchaa sá quidé cuè dútú ñăyiu isràél nũtnahá-xi luha nchaa sá quidé Xítohó Jesucrístú Yaá cúú dútú cùnùu ndecu andiù. Te quèe ndáá-xi nàcuáa ní xáhaⁿ Yă Ndiöxí xii ndíi Moisés cútnàhá tá cùyatni ngũta ndíi dacàa ndíi vehe-gá, te duha ní xáhaⁿ-gă: “Ío váha cada cuendá-n nàcuáa dacàa-n vehe-í dàtná cáá sã ñí dãnèhé ñáhà-í xii-n xití yucu”, duha ní xáhaⁿ-gă xii ndíi.

⁶ Dico vitna chi Xítohó Jesucrístú cúú-gă dútú cùnùu, te ío-gá càhnu nduu chiuⁿ quide-gá dàcúúxí cuè dútú cue ñăyiu isràél. Te diù Xítohó Jesucrístú cúú-gă Yaá quidé tnàhá tnúhu-o ndìhì Yă Ndiöxí, te ducaⁿ chi Yă Ndiöxí ío-gá váha ndùu tnúhu ní cáháⁿ-gá xito cùu uú dàcúúxí tnúhu ní cáháⁿ-gá ndéé díhna, te ducaⁿ ìo váha ndùu tnúhu ní cáháⁿ-gá xito cùu uú chi ní cachí-gá sá ìngá núú sã ìo-gá váha cada ñaha-gă xii-o vitna.

⁷ Te núu nàcuáa ní cachí Yă Ndiöxí cada ñaha-gă xii-o ndéé díhna ni quide-xi nchaa nacuáa tàú-xi cunduù nàcuáa nduu táhú-ó cùndecu váha-o nũú-gă ñá, te ñá túú xini ñuhu-xi cáháⁿ tucu-gá sá cádá-gă ìngá núú sã vâha sá cúú-xí-ó vitna ni cuu.

⁸ Te Yă Ndiöxí ñá túú ní cùu váha iní-gá núú ñăyiu

isràèl nõu xιάⁿ ní cáháⁿ-gá cuendá-yu, te duha ní cachí-gá:

Yúhú cúu-í Dútú Ndiõxí, te duha ndùu tnúhu na cáháⁿ-í: Sáá nduu te cada-í ingá núú sã vãha sá cúu-xí cuè ñaní tnáhá ñãyiu isràèl, ndihí cue ñaní tnáhá ndĩ Jùdá ðiu-ni ñáyiu isràèl.

⁹ Te tnúhu sá cáháⁿ-í-a ñá túú ñⁿ-ni cuu-xi ndihí tnúhu sá ní xáhaⁿ-ĩ xii cue ñáyiu ní cuu ñaní tnáhã-yu ní xíndecu ndéé sanaha càda-í-yu, te ðiu-ni dàvá-áⁿ ñi quide yica-ĩ ní ndeñuhu-í-yu nacióⁿ Ègiptú,

te ñá túú ní cuini-yu tní-yu tnúhu ní xáhaⁿ-ĩ xii-yu cuendá ducaⁿ càda vãha-í-yu,

te xιάⁿ nõu ní dáñá ñihnu-í-yu ñá túú-gã ní quide cuendá-í-yu.

¹⁰ Te na sãá nduu te duha ndùu tucu ingá núú sã vãha cada-í cue ñáyiu isràèl.

Te yúhú cada-í nãcuáa cutnùní vãha iní-yu nãcuáa cuini-í cadá-yu,

te ducaⁿ ñi yuhu ñi iní-yu cadá-yu.

Te yúhú Yã Ndiõxí quindaha-ĩ-yu,

te meé-yu cuú-yu ñáyiu cùu cuendá-í.

¹¹ Te dàvá-áⁿ chi ni ñáyiu cùu ndi meé-yu,

te ni cuè dava-gá ñáyiu vá cùtnúhu tnáhã-yu sá nátùha ñahã-yu xii-í,

chi dàvá-áⁿ nchaa ñáyiu cundecu ndihí ñahã-yu xii-í,

cuèi ñáyiu cùnuu te cuèi ñáyiu ñá túú cùnuu.

¹² Te dàvá-áⁿ cada càhnu iní-í nchaa sá cuèhé sá dúhá quidé-yu,

te vá ñⁿ ndùu-gá ndacu iní-í nchaa sá quidẽ-yu.

Duha ní cachí Yã Ndiõxí cuendá ñáyiu isràèl.

13 Te sá dúcáⁿ ñí cáháⁿ Yă Ndiöxí sá cádá-gă ingá núú sã văha sá cúú-xí ñăyiu xiăⁿ cútnùní sá tnũhu sá ñí cáháⁿ-gá dîhna ñá túú-gă xíní ñùhu-xi. Te cada iní-ó sã tnũhu-áⁿ cúú-xí ñⁿ sá ñí cunaha ndècu te ñá túú-gă nándîhi-xi te cuíta-ná-xi, ducaⁿ sãtnahá-xi cùu tnũhu sá ñí cáháⁿ-gá ndéé dîhna.

9

Cuèndá vehe Yă Ndiöxí

1 Te tnũhu sá ñí cáháⁿ Yă Ndiöxí ndéé dîhna cùu-xi cuendá nàcuáa cada ñăyiu isràél chiñuhu ñàhá-yu xii-gá, ndîhi cuèndá vehe-gá caa ñuyíú-a.

2 Te ñăyiu isràél ní dácáá-yu vehe Yă Ndiöxí, te vehe-áⁿ ñí cuu-xi vehe dóó te ní xúhuⁿ nehú xití-xi. Te cuàrtú dîhna ní xínani-xi cuàrtú ní cuu íí, te xiăⁿ ñí xíndecu ñⁿ sá ndéé dité-xi sá ñí cándodó ñⁿ caa candíl núú dité-xi, te ní xínutnîhi ñⁿ mèsá ní xóo códó pàá ní xóo nduu táhú Yă Ndiöxí.

3 Te cuàrtú cúú ùú ní xínani-xi cuàrtú ní cuu íí víhí-gă.

4 Te xití cuàrtú-áⁿ ñí xínutnîhi ñⁿ sá ñí cuáha mee-ni dîhúⁿ cuááⁿ te núú xiăⁿ ní xóo cahmi-güedé dúsa sá sàháⁿ tnámí. Te diu-ni xiăⁿ ñí xíndecu tucu ñⁿ càjá ní cuu mee-ni dîhúⁿ cuááⁿ te xití càjá-áⁿ ñí xúhuⁿ ñⁿ lítu ní cuáha mee-ni dîhúⁿ cuááⁿ, te xití lítu-áⁿ ñí xúhuⁿ mànáá sá ñí xóo caxí-yu dàvá-áⁿ. Te diu-ni xití càjá-áⁿ ñí xúhuⁿ tnudî ndí Àrón sá ñí saa itá-xi, ndîhi yúú sã ñí xindeé tnũhu ní cáháⁿ Yă Ndiöxí nàcuáa cada ñăyiu. Te duha ní xínani càjá-áⁿ: Càjá sá ñúhú tnũhu ní cáháⁿ Yă Ndiöxí sá cúú-xí ñăyiu, duha ní xínani-xi.

5 Te núú càjá-áⁿ ñí cándodó ùú tnàhá sá ñí cadúha-yu, te xiăⁿ cáá-xí dàtná cáá espíritú xínú

cuèchi núú Yă Ndiöxí. Te cuëndá úú xiăⁿ ní cutnùní iní-yu sá ïo cãhnu cuu Yá Ndiöxí, te sá nĩ cadúha-yu-áⁿ ndèé ndíxíⁿ-xi, te ndíxíⁿ-xi-áⁿ dãhu-xi xio xio núú quidé cãhnu iní Yă Ndiöxí nchaa yíca cuèchi ñáyíu, dico vá cúú-gă cáháⁿ-í cuëndá nchaa dava-gá xiăⁿ vitna.

⁶ Te nchaa xiăⁿ ní xíndecu xití vehe Yá Ndiöxí, te cue dútú nĩ xóo quíhu-güedé ìⁿ nduu ìⁿ nduu xití cuártú díhna ní xóo cada-güedé nàcuáa tàú-güedé cada-güedé sá cúú-xí Yă Ndiöxí.

⁷ Te cuártú cúú ùú-áⁿ chi mee-ni dútú cúnùu ní xóo quíhu-dé ìⁿ xito-ni ndi tnahá cuíá. Te ndi tnahá òré ducaⁿ nĩ xóo quíhu dútú cúnùu-áⁿ te ní xóo canehe-dé níñí nĩ xóo quíhu ní xóo nduu táhú Yă Ndiöxí. Te ducaⁿ nĩ xóo cada dútú-ãⁿ cuëndá sá Yă Ndiöxí cada cãhnu iní-gá nchaa yíca cuèchi mee-dé, ndihí nchaa yíca cuèchi ñáyíu.

⁸ Te sá dúcáⁿ mèe-ni dútú cúnùu ní xóo quíhu-dé xití cuártú ní cuu íí-gă-áⁿ, xiăⁿ Espíritú Yă Ndiöxí quidé-xí cùtnuní iní-ó sã nìni ducaⁿ ní xíndecu vehe-áⁿ nĩ xóo cadá-yu nàcuáa ní xóo cúñaha Yă Ndiöxí cadá-yu. Te xiăⁿ cùtnuní sá vătă sàá-gá nduu cãháⁿ ndihí-yu Yá Ndiöxí nàcuáa tàú-xi cundu.

⁹ Te sá dúcáⁿ nĩ xíndecu vehe-áⁿ, ndihí sá dúcáⁿ nĩ xóo cada nchaa cue dútú-ãⁿ, xiăⁿ cùtnuní iní-ó nàcuáa quide Yá Ndiöxí vitna, chi nchaa quití ní xóo cahni cue dútú-ãⁿ nĩ xóo nduu táhú Yă Ndiöxí, ndihí nchaa dava-gá sá nĩ xóo nduu táhú-gă ñá túú ní quide-xi nacuéa nduu ndoo nduu nine iní cue ñáyíu nàcuáa cutnùní iní-yu sá ñà túú-gă cuèchi-yu ndècu núú Yă Ndiöxí.

10 Te sá dúcáⁿ nǐ xóo cada nchaa dútú-ǎⁿ nǐ níhí tnáhá-xí ndìhì nchaa tnúhu sá dánèhé ñáhá xì ñáyiú ná cúú sǎ cáxǐ-yu ndihì ná cúú sǎ cúú còhó-yu ndihì nàcuáa ndàhá-yu. Te tnúhu-áⁿ nǐ cuu-xi mee-ni sǎ nǐ sanu ichi ñaha xǐ-yu nàcuáa cundecú-yu ñuyíú-a. Te tnúhu-áⁿ nǐ nándíhì-xì ndéé ní sáá nduu nǐ nadama Yá Ndiǒxí tnúhu-áⁿ cuendá sá vǎ dúcáⁿ-gǎ cadá-yu cundecú-yu.

11 Te Xítóhó Jesucrístú ní quixi-gá ñuyíú-a, te ñu-gá cúú-gǎ Yaá cúú dútú cúnùu, te xiǎⁿ nǔu quide-gá nchaa sá vǎha sá cúú-xí-ó. Te vitna ní nucúndecu-gá núú ïo vii ío váha càa, te núú ndécú-gǎ-áⁿ ñà túú cùu-xi ìⁿ vehe sá nǐ dácáá cuè téé ñuyíú-a.

12 Te cada iní-ó sǎ Xítóhó Jesucrístú cuánguihu-gá xití cuártú núú nǐ cuu íi víhí dàtná ní xóo cada dútú cúnùu ní xíndecu ndéé sanaha, chi ní nucúndecu-gá núú ndécú Yá Ndiǒxí. Dico ñá túú ni quide-gá dàtná ní xóo cada dútú cúnùu ní xíndecu ndéé sanaha, chi dútú-ǎⁿ òré ní xóo quíhu-dé xití cuártú ní cuu íi-gǎ-áⁿ, te ní xóo canehe-dé níñí chívá ndihì níñí chěhlu ní xóo quíhu. Dico Xítóhó Jesucrístú chi níñí méé-gǎ ní sati ní xíhí-gá núú cùrúxí, te xiǎⁿ duuⁿ duuⁿ cuáháⁿ-gá ní nucúndecu-gá núú ndécú Yá Ndiǒxí. Te sá dúcáⁿ nǐ quide-gá xiǎⁿ ní naníhí tàhú-ó.

13 Te nchaa ñáyiú ní xóo cada nàcuáa vá cúú-gǎ-yu ñáyiú ní cuu íi, ñáyiú-áⁿ nǐ xóo códó ñáhá cuè dútú níñí ndicutu, ndihì níñí chívá, ndihì yáá cùñú chěhlu quitì sàhni-güedé cuendá nduu íi tucú-yu.

14 ¡Dico níñí Xítóhó Jesucrístú chi ío-gá nándíhì-xi

sá cúu-xí nchòo ñáyiú xĩndecu vitna! Te cuendá níñí-gã-áⁿ, chi Espíritú Yă Ndiõxí sá ndécú nchàa nduu nchaa quiú nĩ cuu ìⁿnuu-xi ndìhi Xítóhó Jesucrìstú sá cúu cùu-gá cuendá cuu-gá dàtná ìⁿ táhú sã cúu-xí Yă Ndiõxí cuëi cùu-gá Yaá ñá túú tnàhí cuéchi-xi, te ní sati níñí-gã te ní xíhí-gá. Te cuendá xĩⁿ ní cutnùnì iní-ó sã Yă Ndiõxí ní quide càhnu iní-gá nchaa sá ñà túú vâha ní quide-o, te ní nduu ndoo ní nduu nine iní-ó. Te ducaⁿ nĩ nduu ndoo ní nduu nine iní-ó cuendá sá ndácú-ó cùnu cuechi-o núú Yă Ndiõxí Yaá ndécú nchàa nduu nchaa quiú.

¹⁵ Te Xítóhó Jesucrìstú ní quide ndáá-gá núú Yă Ndiõxí cuendá cue ñáyiú ndècu ñuyú-a. Te cuendá xĩⁿ Yă Ndiõxí cada-gá ingá núú sã vâha sá cúu-xĩ-yu dàtná ní cachí-gá, te ducaⁿ càda-gá sá cuendá nchaa ñáyiú ní cáháⁿ-gá cundecu ndìhi-gá, chi ñáyiú-áⁿ nduu táhú-yu cundecu ndìhi vâha ñàhá-yu xii-gá nĩ caa nĩ quihíⁿ chi ducaⁿ nĩ cachí-gá, te ducaⁿ chi Xítóhó Jesucrìstú ní xíhí-gá núú cùrúxí cuendá sá Yă Ndiõxí cada càhnu iní-gá nchaa yíca cuéchi-yu, nchaa cuéchi sá nĩ quidé-yu cútnàhá ní cunuu tnúhu sá nĩ cáháⁿ-gá díhna.

¹⁶ Te nchoo xíní-ó sã nũu ìⁿ tée na càdúha ìⁿ tutú nàcuáa cada ñáyiú dàcáhñu-yu nchaa sá ndécú ndìhi-dé, te tutú-áⁿ xíní ñùhu-xi ndéé ná yâha nduu cùu-dé.

¹⁷ Te ñá túú tàú-xi cada ñáyiú nàcuáa càháⁿ-xi núú tütú-áⁿ nini ndècu tée ní cadúha, dico sátá ná yâha cuú-dé te cadá-yu nàcuáa càháⁿ-xi.

¹⁸ Te cuëi tnúhu ní cáháⁿ Yă Ndiõxí ndéé díhna nàcuáa cada vâha-gá ñáyiú, te diu-ni ndìhi níñí nĩ cundáá-xi chi ní sahní-güedé quiti te ní sati

níñí-güedi.

19 Te ndíi Moisés ní cáháⁿ ndodo ndíi núú ncháa ñáyíu nàcuáa ní cachí Yá Ndiöxí cada-yu, te nàcuáa-ní ndùu tnúhu ní chídó tnùní ndíi núú tütú ndíi ní cáháⁿ ndíi, te ní dácá ndíi ndute níñí chēhlu ndíi níñí chívá líhli, te ní queheⁿ ndíi ñⁿ dité yutnu nàni hisópó ndíi luha idi ticuèhé, te ní chindóyo ndíi níñí-áⁿ. Te ní sódó ndíi núú tütú ndèè tnúhu Yá Ndiöxí sá ñí chídó tnùní ndíi-áⁿ, te tnàhá cue ñáyíu xĩndecu-áⁿ ñí chúcú ndíi.

20 Te ní xáhaⁿ ndíi Moisés xií-yu: “Cuèndá níñí-a ní cundáá sá Yá Ndiöxí cada ñaha-gã xii-ndo sã vãha chi ducaⁿ ñí cachí-gá cada-gá sá cúú-xí-ndó”, duha ní xáhaⁿ ndíi xií-yu.

21 Te ñíu-ni ducaⁿ ñí quide tucu ndíi ní chúcú ndíi níñí vehe-gá ndíi ncháa sá nándíi-güedé òré chíñùhu-güedé Yá Ndiöxí ndécú xítí vehe-gá-áⁿ.

22 Te tnúhu ní chídó tnùní ndíi Moisés càchí-xi sá méé-ní níñí chucu-güedé ncháa sá cãnehe chíuⁿ-güedé òré chíñùhu-güedé Yá Ndiöxí, te sacú-nã te ndíi ndoo ncháa xíãⁿ chucu-güedé níñí ni cùu. Te dacuítí ñí xini ñuhu-xi sã cáti níñí cuèndá ducaⁿ càda cahnu iní Yá Ndiöxí ncháa yíca cuèchi ñáyíu.

Xítohó Jesucristú ní xíhí-gá núú cùrúxí cuèndá sá vã cùndecu-gá cuèchi-o núú Yá Ndiöxí

23 Te sá cuèndá sá ñí xíhí Xítohó Jesucristú núú cùrúxí, xíãⁿ ñá túú-gã cuèchi-o ndècu núú Yá Ndiöxí. Te cuèndá ncháa sá ñí xíhí xítí vehe-gá sá ñí dácáá ñáyíu isràél xíãⁿ cùtnùní iní-ó nàcuáa quide-xi núú ndécú-gã. Te dacuítí ñí xini ñuhu-xi sã cáhí-güedé cue quítí ní cachí Yá Ndiöxí cuèndá

nduu íí nchaa sá ñí xíhi xití vehe-gá-áⁿ. Te cuèi ducaⁿ ñí sahani-güedé cue quití-áⁿ dico ñá túú ní quide-xi nacuaa ngúndecu váha-o núú Yă Ndiöxí. Dico Xítohó Jesucristú ní xíhí-gá, te sá ñí xíhí-gá xíáⁿ ní quide-gá nàcuáa ngúndecu váha-o núú Yă Ndiöxí.

24 Te Xítohó Jesucristú cuándaa-gá andiu núú ndécú Yă Ndiöxí càháⁿ ndàhú-gá cuèndá-ó, te Xítohó Jesucristú chi ñá díú ìⁿ vehe ní dácáa cue téé ñuyíú-a cuánguihu-gá. Te vehe Yă Ndiöxí sá ñí dácáa cue ñáyiu isràél ñuyíú-a ndéé sanaha, ndihi nchaa nàcuáa ní xóo cada-güedé xití vehe-gá-áⁿ xíáⁿ cútnùní iní-ó nàcuáa quide-xi núú ndécú-gă.

25 Te dútú cúnùu núú ñáyiu isràél ní xóo quíhu-dé núú cuiá núú cuiá xití cuártú ní cuu íí víhí-gă-áⁿ, te ní xóo canehe-dé níñí ñí xóo quíhu xití cuártú-áⁿ dico ñá díú ñíñí méé-dě. Dico Xítohó Jesucristú chi ñá túú dùcaⁿ ni quide-gá chi ìⁿ xito-ni ní sati níñí-gă te ní xíhí-gá.

26 Chi núu ni xíhí-gá nuu núu te ndéé cútnàhá ní ngáva ñuyíú ducaⁿ ngüita-gá cada-gá ní cùu, te vitna ta ndihi nduu cuáháⁿ ní quixi-gá ñuyíú-a ní xíhí-gá ìⁿ xito-ni cuèndá cuu-gá dàtná ìⁿ táhú să cúú-xí Yă Ndiöxí, te ducaⁿ ñí quide-gá cuèndá sá vă cúndècu-gá cuéchi ñáyiu núú Yă Ndiöxí.

27 Te nchoo cue ñáyiu ñuyíú-a chi ìⁿ xito-ni cuú-ó te dàtnùní ducaⁿ te cada ndáá Yă Ndiöxí cuéchi-o.

28 Te ducaⁿ sãtnahá-xi cùu Xítohó Jesucristú chi ìⁿ xito-ni ní xíhí-gá cuèndá sá vă cúndècu-gá cuéchi ñáyiu núú Yă Ndiöxí, te ducaⁿ ñí cuu ní xíhí-gá chi mee-gă ducaⁿ ñí cachí-gá cunduu. Te quixi

tucu Xítohó Jesucrìstú ñuyíú-a dico ñá díú-gă sá cádá-gă cuendá sá vă cúndècu-gă cuéchi ñáyiu núu Yă Ndiǒxí, chi quixi-gă nacuaca-gă nchaa ñáyiu ndètu ñaha xii-gă cuendá cundecú-yu ndihi-gă ni caa ni quíhíⁿ.

10

¹ Te nchaa tnúhu ní xáhaⁿ ndíi Moisés xii ñáyiu isràel cadá-yu, nchaa tnúhu-áⁿ ñí quide-xi ní cutnùní luha iní-yu nàcuáa cada Yá Ndiǒxí cada váha ñaha-gă xii-o vitna. Dico ñá díú mèi nacuáa ní xáhaⁿ ndíi Moisés xii ñáyiu quide Yá Ndiǒxí vitna chi dăma quide-gă. Te nchaa tnúhu ní cáhánⁿ ndíi Moisés ñá túú ní ndàcu-xi cada-xi nacuáa cundáa nchaa ñáyiu tùha ñaha xii Yá Ndiǒxí cuéi ní xóo cahni-güedé quiti ní xóo nduu táhú-gă núu cuiá núu cuiá.

² Te núu dicó sá ñí xóo cahni-güedé quiti ní xóo nduu táhú Yă Ndiǒxí ní quide-xi nacuáa nduu ndoo nduu nine iní cue ñáyiu, te vá cáhní-gă-güedé cue quiti-áⁿ nduu táhú-gă ní cùu, te ducaⁿ te cutnùní iní-yu sá ñà túú-gă cuéchi-yu ndècu núu Yă Ndiǒxí ní cùu.

³ Te sá dúcáⁿ ñí xóo cahni-güedé quiti ní xóo nduu táhú Yă Ndiǒxí núu cuiá núu cuiá, xíáⁿ ní xóo ndacu iní cue ñáyiu nchaa sá cuèhé sá dúhá ñí xóo cadá-yu.

⁴ Te ducaⁿ chi níñí ndicutu-áⁿ ndihi níñí chivá-áⁿ ñà túú ní xóo ndacu-xi cada-xi nàcuáa vá cúndècu cuéchi-yu núu Yă Ndiǒxí.

⁵ Te xíáⁿ núu cútñahá ní quexìo Xítohó Jesucrìstú ñuyíú-a ní xáhaⁿ-gă xii Yá Ndiǒxí:

Yòhó Tătà-í, ñá túú ndùu vétú váha iní-n sǎ sǎhni-güedě quiṭi ndùu táhú-n,

te ni ñǎ túú ndùu vétú váha tucu iní-n cuendá nchaa dava-gá sá táxí-güedě ndúú táhú-n,

núu xǎⁿ ní quide túha-n yìqui cuñú-í cuendá yúhú cuú-í te nduu táhú ñáhá-n xii-í.

6 Te ni ñà túú ndùu vétú váha iní-n cuendá quiṭi sǎhmi-güedé ndúú táhú-n te ni ñǎ túú ndùu vétú váha iní-n cuendá nchaa dava-gá sá táxí-güedě ndúú táhú-n cuendá sá vǎ cúndècu-gá cuéchi ñáyiu núu-n.

7 Núu xǎⁿ yúhú ní cachí-í xii yòhó Tătà-í Dútú Ndiöxí sá yǔhú véxi-í ñuyíú-a cada-í nchaa sá cuini-n càda-í dàtná yódó tnùní cuendá-í núu tütú-n.

Duha ní xáhaⁿ Xítohó Jesucristú xii Tătá-gǎ Dútú Ndiöxí.

8 Te Xítohó Jesucristú díhna-gá ní xii-gá Yǎ Ndiöxí Yaá cúu Tătá-gǎ: “Yòhó Tătà-í ñǎ túú ndùu vétú váha iní-n cuendá quiṭi sǎhni-güedé ndúú táhú-n, ndihi cuendá quiṭi sǎhmi-güedé ndúú táhú tucu-n cuendá sá vǎ cúndècu-gá cuéchi ñáyiu núu-n, ndihi cuendá nchaa dava-gá táhú sǎ táxí-güedě xii-n ñà túú ndùu vétú váha iní-n cuendá nchaa xǎⁿ”, duha ní xáhaⁿ Xítohó Jesucristú xii Tătá-gǎ Dútú Ndiöxí. Te ducaⁿ ñǎ xáhaⁿ-gǎ cuěi núu tütú ndii Moisés yódó tnùní sá dúcáⁿ càda-güedé.

9 Te sátá dúcáⁿ te ní xáhaⁿ tucu-gá xii Tătá-gǎ Dútú Ndiöxí: “Yòhó Tătà-í Dútú Ndiöxí, mee-í véxi-í ñuyíú-a cuendá cada-í nchaa nàcuáa cuini-n”, duha ní xáhaⁿ-gǎ xii Tătá-gǎ. Te sá dúcáⁿ ñi cáháⁿ Xítohó Jesucristú xǎⁿ ní cutnùní sá ñà túú-gǎ xíní ñùhu-xi ducaⁿ cada-güedé cahni-güedé nchaa

quitì-án, te ducaⁿ chi mee Xítóhó Jesucrístú ní xíhí-gá ní cuu-gá dàtná ìⁿ táhú sǎ cúú-xí Yǎ Ndiǒxí, te ducaⁿ nǐ cuu chi ducaⁿ tnàhí ní cachí Yǎ Ndiǒxí cunduu.

¹⁰ Te Xítóhó Jesucrístú ní quide-gá nàcuáa ní cuiní Yǎ Ndiǒxí cada-gá, chi ní xíhí-gá núú cùrúxí chi ducaⁿ nǐ cuiní méé-gǎ cunduu, te ìⁿ xito-ni ní xíhí-gá sá cuendá nchaa ñáyiú, te cuendá xǎⁿ núu ndècu yíñuhu-o núú-gǎ vitna.

¹¹ Te cue dútú ñáyiú isràél chi ìⁿ nduu ìⁿ nduu ní xóo cahni-güedé quitì ní xóo nduu táhú-gǎ, te ñǎ túú ní dàma-güedé nàcuáa ní xóo cada-güedé. Te nchaa sá nǐ xóo cada-güedé-án ñà túú ní quide-xi nacuáa vá cùndècu-gá cuéchi ñáyiú núú Yǎ Ndiǒxí.

¹² Dico Xítóhó Jesucrístú ní cachí-gá sá cúú cùú-gá, te ní xíhí-gá núú cùrúxí cuendá nchaa yíca cuéchi nchaa nchoo ñáyiú ndècu ñuyíú-a. Te sátá dúcáⁿ te dàtnùnì ní ngóo-gá xio cùha Dútú Ndiǒxí táxí tnùnì-gá, te vá ìⁿ ndùu ìⁿ quíú-gǎ te cuú-gá.

¹³ Te diu-ni xǎⁿ cundecu-gá cundetú-gá ndéé sáa nduu cànehe nchaa sá cúú ùhú iní ñáhá xì-gá sá yíñuhu núú-gǎ.

¹⁴ Te cuendá sá nǐ xíhí Xítóhó Jesucrístú ìⁿ xito-ni xǎⁿ ní cuu-gá dàtná ìⁿ táhú sǎ cúú-xí Yǎ Ndiǒxí, xǎⁿ ní quide-xi sá ncháá ñáyiú cùu cuendá-gá ñǎ túú-gǎ ná cumánì-yu núú-gǎ nì caa nì quíhíⁿ.

¹⁵ Te mee Espíritú Yǎ Ndiǒxí càháⁿ ndáá-xi nàcuáa ní cáháⁿ-gá cuendá-ó, te duha ní cáháⁿ-gá:

¹⁶ Sáa nduu te cada-í nchaa ñáyiú nàcuáa na càháⁿ-í-a,

te cada-í nàcuáa cutnùnì iní-yu tnúhu sá dánèhé-í-yu tnúhu sá cánùìchi ñaha xí-yu

nàcuáa cadá-yu cundecú-yu,
te cada tucu-í sá tnǎi-yu nchaa tnúhu-áⁿ.
Duha ní cachí-gá.

¹⁷ Te ní cachí tucu-gá:

Te vá íⁿ ndùu íⁿ quíú-gă ndacu iní-í sá quidé sàá
iní-yu tnúhu-í,

te ni vǎ íⁿ ndùu íⁿ quíú-gă te ndacu iní-í nchaa sá
cuèhé sá dúhá quidé-yu.

Duha ní cáháⁿ Yǎ Ndiǒxí cǎchí Espíritú-gá.

¹⁸ Te sá dúcáⁿ quide cahnu iní Yǎ Ndiǒxí nchaa
cuéchi-o, núu xǎⁿ ñá túú-gă xíní ñùhu-xi cuú quiti
nduu táhú-gă cuèndá nchaa sá cuèhé sá dúhá
quide-o.

Tàú-ó sǎ tnàhá tnúhu-o ndìhi Yá Ndiǒxí

¹⁹ Te cue dútú ñi xóo cunuu nǎú ñǎyiu isràèl
cue té-áⁿ ñi xóo quíhu-güedé xití cuártú ní cuu íí
víhí-gă. Dico nchoo cuè ñǎyiu ndècu ichi Xítóhó
Jesucrístú vitna tàú-ó sǎ ñi yuhu ñi iní-ó tnàhá
tnúhu-o ndìhi Yá Ndiǒxí. Te cuu tnahá tnúhu-o
ndìhi-gá chi Xítóhó Jesucrístú ní sati ñiñí-gă te ní
xíhí-gá núu cùrúxí.

²⁰ Te cada iní-ó sǎ dǒó sǎ ñi xíndedí nàcuáa ní
xóo quíhu-güedé xití cuártú ní cuu íí víhí-gă-áⁿ
ñi xócuèñí, te ducaⁿ càda iní-ó chi Xítóhó Jesu-
crístú ní xíhí-gá cuèndá nchoo ñihí-ó nàcuáa cada-o
ngǎndecu váha-o sǎ cúú-xí-gă.

²¹ Te ñiu-gá cúú-gă Yaá cúú dǔtú-ó, te ñiu-gá
cúú-gă Dútú cúnùu ndecu-gá núu ndécú Yǎ Ndiǒxí.

²² Núu xǎⁿ xíní ñùhu-xi sá ío tnahá tnúhu-o
ndìhi Yá Ndiǒxí, te vá cání íⁿ cani úú iní-ó, te ío
váha quíndáá iní-ó-gă chi ñiu-gá ní ndada ndoo ní

ndada nine-gá iní-ó cuèndá nchoo cùtnuní iní-ó sã ñã túú-gã cuéchi-o ndècu núú-gã. Te ní sandute-o cuèndá sá dúcáⁿ ñí nduu ndoo ní nduu nine iní-ó.

²³ Te nchoo càháⁿ ndáá-ó sã ndécú ndìhi-o tnúhu ndee iní sá ndúú tãhú-ó cùndecu ndìhi-o Yá Ndiõxí, te xìni ñuhu-xi sá vã dáñá ndéé-ó cãchicúⁿ nihnu-o tnúhu ndee iní-áⁿ chi Yá Ndiõxí cada-gá nàcuáa ní cachí-gá sá cúú-xí-ó.

²⁴ Te xìni ñuhu-xi cuhuⁿ iní tnáhá-ó te chindee tnàha-o nacuáa ducaⁿ cùu iní tnáhá-gã-ó, te cada-o mée-ni sá vãha.

²⁵ Te nchoo vã dáñá ndéé-ó nàtacá-ó nũú dácuaàha-o tnúhu Yá Ndiõxí, te vã cadá-ó dàtná xiquide davá-yu ñã túú-gã cuìní-yu quixí-yu núú dácuaàha-o tnúhu-gá. Chi xìni ñuhu-xi sá cuãha tnàha-o tnúhu ndee iní cãchicúⁿ nihnu-o ìchi-gá, te uuⁿ-gá ducaⁿ tàú-xi cada-o vìtna ta cuyatni nduu quixi tucu Xítóhó Jesucrìstú ñuyíú-a.

²⁶ Te cue ñáyiu sa ní tecú tnùní nàcuáa càháⁿ tnúhu Yá Ndiõxí te núu na ngũita-yu ñucùuⁿ cadá-yu nándi sá cuèhé sá dúhá, te àúⁿ ñã cuu ní xíhí Xítóhó Jesucrìstú cuèndá-yu, te ni vã yõo ìⁿ-gá cuú cuèndá sá vã cùndècu-gá cuéchi-yu núú Yá Ndiõxí.

²⁷ Te núu ducaⁿ na cadá-yu nándi sá cuèhé sá dúhá, te ío quiyùhú iní-yu nàcuáa cada ñaha Yá Ndiõxí xii-yu. Chi nchaa ñáyiu cùu úhú iní ñáhá xii-gá daquìhíⁿ ñáhá-gã xii-yu núú ñùhú núú càyú núú ío ndohó-yu.

²⁸ Te nchaa ñáyiu ní xóo daquèe tihú tnũhu ní cáháⁿ ndíi Moisés, te núu ndècu úú àdi úní ñáyiu càháⁿ ndáá sá dúcáⁿ ñí dáquée tĩhũ-yu tnúhu ní cáháⁿ ndíi, te vã yõo ñí xóo cundàhú iní ñáhá xii

nchaa ñáyiú ducaⁿ ñí xóo cada chi ní xóo cahni ñaha-güedě.

29 Te núu ducaⁿ ñí ndoho cue ñáyiú ducaⁿ ñí dáquée tǐhú tnǔhu ní cáháⁿ ndíi Moisés-áⁿ, te uuⁿ-gá ndoho cue ñáyiú dàquee tǐhú ñáhá xì Xítóhó Jesu-crístú Yaá cúú Dēhe Yá Ndiǒxí ñiú-ni ñáyiú cǎchí sá ñà túú nàndíhi níñí-gǎ. Te níñí-gǎ-áⁿ ñí sati, te ní xíhí-gá, te ducaⁿ ñí cuu cuendá cada Yá Ndiǒxí ingá núú sǎ vǎha sá cúú-xí nchòo ñáyiú ndècu ñuyíú-a dàtná ní cǎchí-gá cada-gá. Te ñiú-ni cuendá níñí-gǎ-áⁿ ñí nduu ndoo ní nduu nine iní cue ñáyiú-áⁿ ní cùu, te ñiú-ni ñáyiú-áⁿ cǎháⁿ úhú-yu Espíritú Yǎ Ndiǒxí sá chíndèe chitúu ñaha xii-o.

30 Te nchoo sà naha-o sá Yǎ Ndiǒxí cǎchí-gá ñⁿ xichi núú tǔtú-gá: “Yúhú cada-í te nacháhu ñáyiú nchaa sá quídě-yu, te duha cǎháⁿ-í chi nachinaa-í cuendá nchaa sá quídě-yu-áⁿ”, duha cǎchí-gá. Te sa ñaha tucu-o nacuáa cǎháⁿ-xi núú tǔtú-gá núú cǎchí-xi: “Yá Ndiǒxí cada ndáá-gá cuendá nchaa sá quídé ñáyiú cùu cuendá-gá”, duha cǎchí-xi núú tǔtú-gá.

31 Te ío ndáhú ndoho cue ñáyiú na dàndoho ñaha Yá Ndiǒxí, te ñiú-gá cúú-gǎ Yaá cúnùu nchaa nduu nchaa quíú!

32 Te chí dándàcu iní nàcuáa ní quide-ndo cǔtnáhá vitna cuu saa ní tecú tnùní-ndó tnǔhu Yá Ndiǒxí, chí dàvá-áⁿ ñí quide cǎhnu iní-ndó cuéi nándi sá ñí yáha-ndo cuendá-gá.

33 Te dava-ndo ñí quide úhú ñáhá ñáyiú xii-ndo núú chítú núú tàcá, te nándi tnúhu cuèhé tnúhu duha ní xáhǎⁿ-yu xii-ndo. Te dava-ndo ñí cuyí-ni-ndo ñí xíndecu ndíhi tnàha-ndo cuéi nándi

ní ndoho dava-gá-ndó.

³⁴ Te ní cundàhú iní-ndó cuè ñáyiú yìhi vecaá, te cuèi ní quendeé ñáyiú sá ndécú ndìhi-ndo dico ñá túú ní ndìhú iní-ndó chi ní cudíí-ni iní-ndó. Te ducaⁿ ñi quide-ndo chi sa ñaha-ndo sá ndúú tǎhú-ndó sǎ ïo-gá váha, te xǎⁿ cundecu ndìhi-ndo ñi caa ñi quíhíⁿ.

³⁵ Te xǎⁿ vá dáñá ndèé-ndó quíndáá iní-ndó nàcuáa ní cachí Yǎ Ndiǒxí cada ñaha-gǎ xii-ndo, chi sáá nduu te ío váha cada ñaha-gǎ xii-ndo.

³⁶ Te nchòhó xíní ñùhu-xi ío cada ndee ìní-ndó càda-ndo nchaa nacuáa càháⁿ Yǎ Ndiǒxí, te ducaⁿ te nduu táhú-ndó sǎ ñi cachí-gá nduu táhú-ndó cùndecu ndìhi-ndo ñi caa ñi quíhíⁿ.

³⁷ Te Yǎ Ndiǒxí càchí-gá núú tütú-gá: Ta cùyatni víi-nǎ nduu quìxi Yaá quixi ñuyíú-a, te vá cúyàa-gá.

³⁸ Te nchaa ñáyiú cùndáá núu-í ñá túú dàña ndeé-yu sàndáá iní ñáhǎ-yu xii-í, te cuèndá xǎⁿ cundecu-ní-yu ichi-í, dico núu na dàñá-yu ichi-í te vá cúú vǎha iní-í núú-yu.

Duha càchí Yǎ Ndiǒxí núú tütú-gá.

³⁹ Dico nchoo chi ñá túú cùu-o ñáyiú ducaⁿ xíquide dàñá-ó ichi Yǎ Ndiǒxí, chi cùu-o ñáyiú nchìcúⁿ nihnu-ni sàndáá iní-ó-gǎ, te sá dúcáⁿ te nduu táhú-ó cùndecu-o ndìhi-gá ñi caa ñi quíhíⁿ, te ñá túú cùu-o ñáyiú dàña nihnu ichi-gá te xíta nihnú-yu.

11

Ñáyiú sàndáá iní ñáhá xii Yǎ Ndiǒxí

¹ Te núu sàndáá ndisa iní-ó Yă Ndiöxí te ducaⁿ cùtnuní ndáá iní-ó sǎ ñihí-ó sǎ cuìní-ó nǔú-gǎ. Te núu sàndáá iní-ó-gǎ te ducaⁿ cùtnuní ndáá tucu iní-ó sǎ càháⁿ ndáá-gǎ cuèndá nchaa sá ñà túú xìní-ó.

² Te ducaⁿ ñǎ quide ñáyiu ní xíndecu ndéé sanaha ío ní sándáá iní-yu Yá Ndiöxí te xǎⁿ nǔu ío váha ní cuu iní ñáhá-gǎ xií-yu.

³ Te núu nchoo sàndáá ndisa iní-ó Yă Ndiöxí te cùtnuní ndáá iní-ó sǎ sǎ cuèndá tnúhu ní cáháⁿ-gǎ ní cuáha andíu ndìhi ñuyíú-a. Te cùtnuní iní-ó sǎ ñà díú sǎ cuèndá ñⁿ sá tǔu ndèhe-o ío ñuyíú-a ní cuáha andíu ndìhi ñuyíú-a.

⁴ Te ndíi Àbél ío ní sándáá iní ndíi Yá Ndiöxí nǔu xǎⁿ ío-gǎ ní cuu iní-gǎ sá ñǎ sáñaha ndíi ní nduu táhú-gǎ dàcúúxí sǎ ñǎ sáñaha ndíi Cǎin xii-gǎ ní nduu táhú-gǎ. Te ndíi Àbél-áⁿ ñǎ cutnùní iní ndíi sá ñǎ cudíu ndíi núú Yă Ndiöxí cuèndá sá ñǎ queheⁿ cuèndá-gǎ sá ñǎ sáñaha ndíi ní nduu táhú-gǎ. Te cuèi ñá túú-gǎ ndíi ndècu ñuyíú-a dico yòdo tñuní sá ñǎ sándáá iní ndíi Yá Ndiöxí cuèndá ducaⁿ càda-o canchicúⁿ nihnu-o.

⁵ Te té Ènóc téé ní xíndecu ndéé sanaha ñà túú ní xǎhí-dé chi ní nacuaca ñaha túu Yá Ndiöxí xii-dé cuèndá sá ñǎ sándáá iní ñáhá-dé xii-gǎ. Te vá yòo ni nànihí ñáhá xii-dé chi mee-gǎ ní nacuaca ñaha-gǎ xii-dé. Te núú tútú Yă Ndiöxí càchí-xi sá cùtnàhá vátá nàcuàca ñaha-gǎ xii té Ènóc, te ní quide-dé mee-ni nàcuáa ní cuu váha iní ñáhá-gǎ xii-dé.

⁶ Te nchaa ñáyiu ñá túú sàndáá iní ñáhá xii Yá Ndiöxí ñá ndácǔ-yu cadá-yu nàcuáa cudíu-yu núú-gǎ, chi nchaa ñáyiu cuìní tuha ñaha xii-gǎ xini ñùhu-xi sá quíndáá iní-yu sá ndécú-gǎ, te quíndáá

iní-yu sá nũu na nànducu nihnu ñahá-yu xii-gá te cuañaha-gã xií-yu sá ndúú tãhũ-yu.

7 Te Yá Ndiõxí ní dátũha-gá ndíi Nõé nchaa nàcuáa cada-gá. Te ní quide ndíi nchaa nàcuáa ní xáhaⁿ Yã Ndiõxí cada ndíi, te ní cadúha ndíi ñⁿ bàrcú cuendá xití bàrcú-áⁿ quëe ndíi ndihí nchaa ñãyiu vehe ndíi cuendá cácu nihnú-yu. Te ducaⁿ ñí quide ndíi chi ní sándáá iní ndíi Yá Ndiõxí. Te sá dúcáⁿ ñí sándáá iní ndíi-áⁿ Yã Ndiõxí xiãⁿ ní cutnùní sá ncháá ñãyiu ío ndècu cuéchi-yu, chi ñá túú ní cãchicúⁿ nihnú-yu cadá-yu nàcuáa ní quide ndíi. Te sá dúcáⁿ ñí quide ndíi ní sándáá iní ndíi Yá Ndiõxí xiãⁿ ío ní cundáá ndíi núú-gã.

8 Te Yá Ndiõxí ní xáhaⁿ-gã xii ndíi Àbrahám sá quëé ndíi ñuú núú ndécú ndíi quíhíⁿ ndíi ñngá xichi cundecu ndíi. Te ní quide ndíi nàcuáa ní xáhaⁿ Yã Ndiõxí chi ní quee ndíi cuáháⁿ ndíi núú cuañaha Yã Ndiõxí cundecu ndíi. Te òré ní quee ndíi núú ndécú ndíi te ñá túú ní cùtnuní iní ndíi ndèé cúú nũú cuáháⁿ ndíi cundecu ndíi. Te ducaⁿ ñí quide ndíi chi ní sándáá iní ndíi Yá Ndiõxí.

9 Te sá dúcáⁿ ñí sándáá iní ndíi Yá Ndiõxí nũu xiãⁿ ní xíndecu ndíi núú ñí sãñaha-gã cundecu ndíi, te cuëi ducaⁿ dico ñá túú ní quide ñuú ndíi xiáⁿ. Te ní xóo cundecu ndíi vehe cùtexínu vehe dóó. Te diu-ni ducaⁿ ñí quide ndíi Isáac ndihí ndíi Jácób chi tñahá cue ndíi-áⁿ ñí cachí Yã Ndiõxí sá ndúú tãhú cue ndíi xiáⁿ cundecu cue ndíi.

10 Te ducaⁿ ñí quide ndíi Àbrahám chi ní xíndetu ndíi ndèé ní sáá nduu ndùu tãhú ndíi cundecu ndíi núú ndécú Yã Ndiõxí. Te núú ndécú-gã-áⁿ cúú-xí ñũú ní cadúha mee-gã, te ñuú-áⁿ cudíi-xi ñí caa ñí quíhíⁿ.

11 Te ndíi Sără, sa ní xídó cuíá ndíi sá cóó dēhe ndíi chi sa ní sahnú v̄hi ndíi, dico Yá Ndiõxí ní quide-gá te ní xóo ñⁿ déhe ndíi. Te ducaⁿ chi ní sándáá iní ndíi Yá Ndiõxí te ní cutnùní ndáá iní ndíi sá cádá-gă nàcuáa ní xáhaⁿ-gă xii ndíi.

12 Te cuēi ío ní sahnú ndíi Àbrahám ndih̄i ñadìh̄i ndíi, ndíi Sără dico dacuítíi ñ nduu táhũ-yu ní xóo ñⁿ déhe-yu. Te xíãⁿ nõu ío cuéhé ndíquín yává ndíi Àbrahám ní cáyá dàtná cuéhé chòdíní ndéé andũ, ndih̄i dàtná cuéhé ñuhu cúchí làmár, chi ni v̄ yõ ñⁿ ndacu cahu ñaha xíi-yu sá cuēhẽ-yu.

13 Te cue ndíi-áⁿ ducaⁿ-ni ñ sándáá iní cue ndíi Yá Ndiõxí ndéé ní sáá nduu ñ xíhí cue ndíi. Te cue ndíi-áⁿ ñà túú ní ndùu táhú cue ndíi quíní cue ndíi nchaa nàcuáa ní cachí Yã Ndiõxí cada-gá, dico ní cutnùní ndáá iní cue ndíi-áⁿ nàcuáa cada-gá núu cuáháⁿ núu v̄xi. Te ío ní cudíi ìní cue ndíi, te ní cachí cue ndíi sá dicó-ni ichi yáha cue ndíi ñuyíú-a, chi ñá díú ñuyíú-a cundecu ducaⁿ cuè ndíi.

14 Te sá dúcáⁿ ndùu tnúhu ní cáháⁿ cue ndíi-áⁿ, xíãⁿ ní cutnùní sá cuíní cue ndíi ñgá xichi núu cùndècu cue ndíi.

15 Te ni ñà díú ñùú núú ñ quee cue ndíi ni cuíní cue ndíi núhú cue ndíi. Chi núu ducaⁿ ni sàni iní cue ndíi te núhú cue ndíi ni cùu.

16 Dico ñáhá chi cuíní cue ndíi quíh̄iⁿ cue ndíi ñⁿ xichi núu v̄ha-gá cáá cùndecu cue ndíi. Te núu dúcáⁿ ño-gá váha càa-áⁿ cúu-xí ñùú núú ndécú Yã Ndiõxí, te sá dúcáⁿ ñ sani iní cue ndíi xíãⁿ nõu ío váha cùu iní Yã Ndiõxí càchí-gá sá ñà túú cùcahaⁿ núu-gă cúu-gă Ndiõxí cue ndíi-áⁿ, te cùtnuní iní-ó sã ndáá sá dúcáⁿ càháⁿ-gá chi ní quide túha-gá ñⁿ xichi núu cùndècu cue ndíi-áⁿ.

17 Te ndíi Àbrahám ní xíndecu ìndii-ni déhe ndíi ndíhi ñadíhi ndíi, te cútnàhá ní xito ndéé ñáhá Yá Ndiõxí xii ndíi ní xícaⁿ-gá déhe ndíi, ndíi Isàác cuèndá nduu táhú ñáhá-gã xii ndíi. Te ní xáhaⁿ ndíi sá cúú ndùu táhú-gã déhe ndíi, te ducaⁿ ñí quide ndíi chi ní sándáá iní ñáhá ndíi xii-gá. Te sa ndècu túha ndíi sá cuãñaha ndíi déhe ndíi xii-gá cuèi mee Yá Ndiõxí ní xáhaⁿ ndáá-gá xii ndíi

18 sá sã cuèndá ndíi Isàác te ngúndecu cue ñaní tnáhá ndíi.

19 Te ducaⁿ ñí quide ndíi Àbrahám, chi ní cutnùní ndáá iní ndíi sá Yá Ndiõxí ndácú-gã dándòto-gá cuèi ñáyiu sa ní xíhí. Te sá dúcaⁿ ñí xáhaⁿ ndíi xii Yá Ndiõxí sá cúú ndùu táhú-gã déhe ndíi, te xíãⁿ cada iní-ó sã sà ní xíhí ndíi Isàác te ní ndoto tucu ndíi ní nucúndecu ndíi ndíhi tãtá ndíi, ndíi Àbrahám.

20 Te ndíi Isàác ní xícaⁿ táhú ndíi núú Yá Ndiõxí cuèndá sá cadá vãha-gã cue déhe ndíi, ndíi Jàcób ndíhi ndíi Esàù núú cuàháⁿ núú vëxi. Te ducaⁿ ñí quide ndíi chi ní sándáá iní ndíi Yá Ndiõxí.

21 Te sa ta cùyatni-ná nduu cùú ndíi Jàcób, te ní xícaⁿ táhú ndíi núú Yá Ndiõxí cuèndá cue déhe ñaní ndíi déhe ndíi Chèé. Te yituu-ná ndíi tatnu ndíi ní chiñuhu ndíi Yá Ndiõxí. Te ducaⁿ ñí quide ndíi chi ní sándáá iní ñáhá ndíi xii-gá.

22 Te cútnàhá sa ta cùyatni vií-nã nduu cùú ndíi Chèé, te ní cachí ndíi sá cuè ñáyiu isràél sáá nduu quèé-yu núú xíndecú-yu-áⁿ. Te ní cáháⁿ tucu ndíi nàcuáa cadá-yu yiqui cùñú ndíi na sàá nduu quèè-yu núú ndécũ-yu-áⁿ. Te ducaⁿ ñí quide ndíi chi ní sándáá iní ndíi Yá Ndiõxí.

23 Te cútnàhá ní cacu ndíi Moisés te ní chiváha ñaha nãná ndíi ndíhi tãtá ndíi úní yóó. Te ducaⁿ ñí quide cue ndíi-áⁿ chi ní sándáá iní cue ndíi Yá

Ndiöxí. Te ní quide cuendá cue ndí-áⁿ sã ïo váha càa ndí Moisés dèhe cue ndí, te ñá túú ní yùhú cue ndí nàcuáa ní cáháⁿ tée cùu Faraón sá cáhní-dè cue landú.

²⁴ Te sáta nĩ sahnú ndí Moisés te duuⁿ duuⁿ ní cachí ndí sá vã càháⁿ ñáyíu sá dèhe yoco tée cùu Faraón cúu nãná ndí. Te ducaⁿ nĩ quide ndí chi ní sándáá iní ndí Yá Ndiöxí.

²⁵ Te ducaⁿ nĩ quide tucu ndí chi ní tnahá-gá iní ndí ndoho ndí ndíhi nchaa ñáyíu cùu cuendá Yá Ndiöxí dàcúxí sã cúdǎ iní ndí cundecu tnaa ndí ichi cuèhé ichi duha.

²⁶ Chi ní sani iní ndí sá vãha-gá ndoho ndí cúcuèhé ñáhá cuè ñáyíu xii ndí sá cuendá Yaá quixi ñuyíú-a dàcúxí sã cündècu ndíhi ndí nchaa sá ïo Ègiptú. Te ducaⁿ nĩ quide ndí chi ní xúhuⁿ iní ndí sá Yá Ndiöxí cuãñaha-gã sá ndúú tãhú ndí.

²⁷ Te ndí Moisés ní quee ndí nàcióⁿ Ègiptú te ñá túú ní quide cuendá ndí sá ïo cùdèéⁿ tée cùu Faraón núú ndí. Te ducaⁿ nĩ quide ndí chi ní sándáá iní ndí Yá Ndiöxí. Te ní quide càhnu iní ndí cuendá nchaa sá nĩ yáha ndí, te ní quide iní ndí sá Yá Ndiöxí ndécú ndíhi ñaha túu-gá xii ndí cuèi ñá túú ní xíní núú ñáhá ndí xii-gá. Te ducaⁿ nĩ sani iní ndí chi Yá Ndiöxí ndécú ndíhi ñaha-gá xii ndí.

²⁸ Te ndí Moisés cúu ndí tée ní tausaha nĩ quide vico pàscuá ndíhi cue ñáyíu isràél, te dàvá-áⁿ nĩ táuchíúⁿ ndí ní sahní-yu mbèé te níñí quiti-áⁿ nĩ dácánùú-yu yuyèhé-yu. Te ducaⁿ nĩ quide ndí chi ní sándáá iní ndí Yá Ndiöxí. Te ducaⁿ nĩ quide tucu ndí cuendá sá espíritú sá nĩ tendaha Yá Ndiöxí cahni-xi mee-ni dèhe tée dèhe díhna cue ñáyíu Ègiptú, te vá cáhní-xí nì ìⁿ dèhe cue ñáyíu

israèl.

²⁹ Te ndute làmár sá nání Mǎr Tícuèhé ní quée dava-xi ní natúu ñuhu yìchí ní níhí nǐ yáha cue ñáyiú israèl. Te ducaⁿ nǐ cuu chi ní sándáá iní-yu Yá Ndiöxí. Te cue téé Ègíptú tnàhá-güedé nchìcúⁿ-güedé cuáháⁿ dico ñá túú ní ndàcu-güedé yáha-güedé chi ní ndihì-güedé ní cáhá.

³⁰ Te cue ñáyiú israèl ní dúcúⁿ ndée-yu úsá nduu ñúú Jericó te ní ngoyo nchaa sá ñúdòco. Te ducaⁿ nǐ cuu chi ní sándáá iní-yu Yá Ndiöxí.

³¹ Te #ⁿ ñaha ní xíndecu ichi díí iní ní xínani-aⁿ Ràháb, ñaha-áⁿ ñà túú ní xíhí-aⁿ dàtná ní xíhí nchaa ñáyiú ío ní cuu sáá iní-xi núú Yá Ndiöxí, chi ní cuu váha iní-aⁿ núú cuè téé ní tendaha cuè ñáyiú israèl ní sángoto dayuhu ñúú-aⁿ. Te ducaⁿ nǐ quide-aⁿ chi ní sándáá iní-aⁿ Yá Ndiöxí.

³² Te núu dícó sá cúú te cáháⁿ-í cuendá ndíí Gedèón, ndihì cuendá ndíí Bàrác, ndihì cuendá ndíí Sànsón, ndihì cuendá ndíí Jèfté, ndihì cuendá ndíí Dàvíí, ndihì cuendá ndíí Sàmuel, ndihì cuendá nchaa cue téé ní xóo cáháⁿ tnúhu Yá Ndiöxí ndée sanaha, te nchaa cuendá cue téé-áⁿ cǎháⁿ-í te núu dícó cùyáchí-í dico ñá túú cùyáchí-í.

³³ Te nchaa cue ndíí-áⁿ nǐ sándáá iní cue ndíí Yá Ndiöxí nǔu xíáⁿ ní xóo ndacu cue ndíí ní xóo nàá cue ndíí ndihì nchaa ñáyiú dava-gá ñúú. Te nchaa ñáyiú-áⁿ ñà túú ní xóo ndacú-yu nàá-yu ndihì cue ndíí, te ní xóo cada cue ndíí nchaa nàcuáa tàú-xi cunduu, te ní quide váha ñaha Yá Ndiöxí xii cue ndíí dàtná ní cachí-gá cada ñaha-gǎ xii cue ndíí. Te cuèi nchaa cue quiti dééⁿ ñà túú ní ndàcu-güedi ná cada ñaha-güedi xii cue ndíí.

³⁴ Te ní xóo ndacu cue ndíí ní xóo ndahvá cue ndíí ñuhú sá vǎ yóo tnàhí ndàcu ndahvá, te ní cácu

cue ndíi vá yõo ni ndàcu cahni ñaha xii cue ndíi. Te cue ndíi-án ñà túú ñihí ndéé cuè ndíi ni cùu, dico ní níhí ndéé cuè ndíi chi Yá Ndiõxí ní chindee ñaha-gá xii cue ndíi, te nchaa ndíi-án ïo ní níhí ndéé cuè ndíi ní nàá cue ndíi ndihí nchaa ñáyiú ní cuu úhú iní ñáhá xii cue ndíi, te nchaa ñáyiú ducaⁿ ñí xóo nàá ndihí cue ndíi-án ñà túú ní xóo ndacú-yu nàá ndihí ñáhá-yu xii cue ndíi chi ní xóo cunú-yu. Te ducaⁿ ñí cuu chi ní sándáá iní cue ndíi Yá Ndiõxí.

³⁵ Te dava ñáyiú ñihí ní nduu táhũ-yu ní ndoto cue ñáyiú ní xíndecu ndihí-yu ní nucúndecu ndihí ñaha tucú-yu.

Te dava ñáyiú ío ní dándóhó ñaha tnaha ñáyiú-yu te ní xihí-yu, dico ñá túú ní dàñá-yu ichi váha nàcuáa cácu nihnú-yu núú tnaha ñáyiú-yu, te ducaⁿ chi ní cuiní-yu sá ndótõ-yu ndéé cuéé-gá nàcuáa ngúndecu váha-yu núú ndécú Yá Ndiõxí.

³⁶ Te dava cue ndíi ío ní ndoho cue ndíi chi ío ní cudíquí ndéé ñáhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñáhá-yu, te ní chihí ñáhá-yu xii cue ndíi vecaá.

³⁷ Te dava cue ndíi ní sahani ñáhá-yu ndihí yúú. Te dava cue ndíi ní chidava ndáá ñáhã-yu ní xehndé ñáhã-yu ndihí sièrrá. Te dava cue ndíi ní xito ndéé ñáhã-yu te núu ndisa sá sándáá iní cue ndíi Yá Ndiõxí, te dava cue ndíi ní sahani ñáhá-yu ndihí machití. Te mee-ni ñì mbéé ndihí ñì chivá, ní xóo cuu dóó cue ndíi. Te mee-ni ñì cue quití-án ñí xóo cuu dóó cue ndíi cuèi ndëni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandihú-yu iní cue ndíi, te nándi sá ñí xóo cada ñáhá-yu xii cue ndíi ní xóo dandòho ñáhá-yu.

38 Te cue ndíi-áⁿ ïo-gá ní xínduu váha iní cue ndíi dàcúúxí nchàa dava-gá ñáyiú. Te nchaa cue ndíi-áⁿ ñí xica cuu cue ndíi cuèi nchaa núú ñà túú vǎ yǒo tnàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te nděni ní cuu nchìi yaú ní xóo cundecu cue ndíi.

39 Te ío ní cudíu cue ndíi núú Yǎ Ndiǒxí cuendá sá ni sándáá iní ñáhá cuè ndíi xii-gá. Te cuèi ducaⁿ ñí quide cue ndíi dico ñá túú ní xíní cue ndíi nchaa sá ñí cachí Yǎ Ndiǒxí cada-gá.

40 Te ducaⁿ ñí cuu chi ñⁿ sá ïo-gá váha ní cachí Yǎ Ndiǒxí cada-gá. Te sá dúcáⁿ ïo-gá váha ní cachí-gá cada-gá cúú-xí cuendá nchoo ndíi; cuendá cue ndíi-áⁿ cuendá sá ñà díú mèe-ni cue ndíi-áⁿ cundáá cue ndíi núú-gá, chi tnàhá nchoo cundáá-ó núú-gá.

12

Ío cuhuⁿ iní-ó Xǐtohó Jesucrístú

1 Te cue ñáyiú ní xíndecu ndéé sanaha ñí quidé-yu nàcuáa ní cutnùní sá ñí sándáá iní-yu Yǎ Ndiǒxí. Te cada iní-ó sǎ ncháá ñáyiú-áⁿ xǐndéhé ñáhá-yu xii-o vitna. Núu xǐáⁿ xíní ñùhu-xí sá vǎ cáda-ó ñí ñⁿ sá cuèhé sá dúhá chi díu nchaa xǐáⁿ quidé-xí ñà túú cundáá-ó núú Yǎ Ndiǒxí. Te vá cáda cuendá-ó nchàa sá quidé tneñu iní-ó nàcuáa ndacu-o càda-o nchaa nacuáa càháⁿ-gá. Te ío càhnu cunduu iní-ó cànchicúⁿ nihnu-o càda-o nchaa nacuáa ní cachí-gá cada-o cundecu-o ñuyíú-a.

2 Te ío cuhuⁿ iní-ó Xǐtohó Jesucrístú, chi díu-gá ní quide ní sándáá iní-ó Yǎ Ndiǒxí, te díu-ni ducaⁿ quide-gá cuèi vitna te cuèi ndéé núú cuaháⁿ núú vǐxi díu-ni ducaⁿ càda-gá sá quíndáá iní-ó Yǎ

Ndiöxí. Te Xítohó Jesucrístú ío ní quide ndee ìní-gá ní ndoho-gá te ní xíhí-gá núú cùrúxí, te ñá túú ní quide cuendá-gá cuèi ìⁿ sácáⁿnúú cúú-xí sǎ dúcáⁿ ñí ndoho-gá. Te ducaⁿ ñí quide-gá chi sa ñaha-gá sá ná yǎha sá dúcáⁿ ndòho-gá te ío cudí^í ìní-gá. Te vitna nùcòo-gá xio cùha núú núcòo Yá Ndiöxí te tàxi tnuní-gá.

³ Te xìni ñuhu-xi sá ìo cada cuendá-ndó nàcuáa ní quide Xítohó Jesucrístú chi Yaá-áⁿ ìo ní quide càhnu ìní-gá nchaa sá ñí ndoho-gá ní quide ñaha nchàa ñáyiu ndècu ichi cuehé ichi duha xii-gá. Te ducaⁿ càda cuendá-ndó nàcuáa ní quide-gá cuendá sá vǎ tǔu dusaⁿ-ndo, te ni vǎ nátùhú ìní-ndó càda-ndo nchaa nacuáa càháⁿ-gá.

⁴ Te nchòhó dáquèe tihú-ndó nchàa sá cuèhé sá dúhá dico vátá cáhni ñaha-gá-yu xii-ndo sǎ dúcáⁿ quide-ndo.

⁵ Te ndacu ìní-ndó nàcuáa càháⁿ Tǎtá-ó Dǔtú Ndiöxí dásàhú ñáhá-gá xii nchoo cuè ñáyiu cùu déhe-gá. Te duha càchí-gá núú tütú-gá:

Nchòhó cue déhe mee-ì, vá cání ìní-ndó sǎ àúⁿ ñǎ cuu dándoho ñaha-í xii-ndo,

te ni vǎ nátùhú ìní-ndó òré càháⁿ-í dóho-ndo nàcuáa cada-ndo cùndecu-ndo.

⁶ Chi mee-ì dándòho-í nchaa ñáyiu cùu ìní-í cuendá sá cùndǎá-yu núú-í,

te quide úhú-í-yu, te diu-ní-yu cùú-yu ñáyiu càchí-í cúú dǎhe-í.

Duha càchí-gá núú tütú-gá.

⁷ Te ío cada ndee ìní-ndó sǎ dúcáⁿ dándoho ñaha Yá Ndiöxí xii-ndo, chi quide-gá sá cúú-gǎ Tǎtá-ó. Te ñá túú ñí ìⁿ tée cùu tǎtá te cachí-ó sǎ ñà túú sànu ichi-dé cue déhe-dé nàcuáa tàú-xi cunduu.

⁸ Te núu Yá Ndiöxí ñá túú dándoho ñaha-gá xii-ndo dàtná dándòho-gá cue ñáyiú cächí-gá cúú dèhe-gá, te ñá díú dèhe mee-gă cúú-ndó te núu ducaⁿ, chi cùu-ndo datná cue ñáyiú ñá túú cùtnuní yoo cùu tátá-xi.

⁹ Te nchoo sà naha-o sá cùtnàhá ní cuu landú-ó nǐ sanu ichi ñaha tátá-ó nàcuáa tàú-xi cunduu, te ducaⁿ nǐ xóo canehe-o sǎ yíñùhu núú-güedě te ñu-ni ducaⁿ nèhe-o sá yíñùhu núú-güedě vitna. Te núu ducaⁿ nǐ sándáá iní-ó tátá-ó, te ío-gá xíní ñùhu-xi quíndáá iní-ó Tátá-ó Dütú Ndiöxí cuendá ducaⁿ ndùu táhú-ó cùndecu-o ndihí-gá nǐ caa nǐ quíhíⁿ, chi ñu-gá cúú-gă Yaá ní chihi iní-ó.

¹⁰ Te cùtnàhá ní cuu landú-ó, ñá túú tǐtní nduu nǐ càniha tátá-ó nǐ sanu ichi ñaha-güedě xii-o nàcuáa ní cuu iní méé-güedě. Te Yá Ndiöxí ducaⁿ dándoho ñaha-gá xii-o sànu ichi ñaha-gá cuendá cúú-xí sǎ vǎha sá cúú-xí-ó, te ducaⁿ quíde-gá cuendá nchoo càda ndáá-ó dàtná quídé mèe-gá.

¹¹ Te òré véxi ñⁿ tnúndòho sá cúú-xí-ó te ñá túú cùdíí iní-ó chi dándihú iní ñáhá-xí xii-o. Te nchaa ñáyiú ngúnu ichi sá cuendá nchaa tnúndòho-áⁿ te ngüíta-yu quíde ndáá-yu, te ío vǎha cùu iní-yu ndècú-yu.

Vá dáquèe tihú-ó tnũhu Yá Ndiöxí

¹² Te núu xiǎⁿ ío chí ndúcú ndèe-gá canchicúⁿ nihnu-ndo ìchi Xítohó Jesucristú, te vá dìcò yica cùu iní-ndó càncchicúⁿ nihnu-ndo ìchi-gá.

¹³ Te cada vǎha-ndo cùndecu-ndo ichi-gá cuendá nchaa ñáyiú sàni ñⁿ sani úú iní-xi níhí ndéě-yu cundecú-yu ichi-gá te vá ná tũhú iní-yu canchicúⁿ nihnú-yu.

14 Te nduçu-ndo nàcuáa cada-ndo cùndecu váha-ndo ndihi cue tnaha ñáyi-ndo, te ío cada váha-ndo cùndecu-ndo nacuáa cundáá-ndó núú Yă Ndiöxí chi núu vá dúcáⁿ càda-ndo te vá ndúú tǎhú-ndó cùndecu-ndo ndihi-gá.

15 Te ío váha cada cuèndá-ndó nàcuáa cada-ndo cùndecu-ndo, chi núu ñáhá te vá chindèe ñaha-gá Yă Ndiöxí xii-ndo. Te ío váha cada cuèndá tucu-ndo nàcuáa cundecu-ndo vǎ cání cuèhé iní-ndó cuèndá Yă Ndiöxí, chi núu ducaⁿ na càda-ndo te dava-gá ñáyi-ndècu ndihi-ndo ichi-gá tnàhá-yu ngüíta-yu ducaⁿ càdá-yu, te vá cùndècu váha-gá-ndó ndihí-yu ichi-gá.

16 Te cada cuèndá tucu-ndo sǎ vǎ cùndècu-ndo ichi díí iní, te ní vǎ dáquèe tihú-ndó ní ñⁿ sá cúú cuèndá Yă Ndiöxí dàtná ní quide ndí Esàú, chi sá cuǎñaha tǎtá ndí-áⁿ nduu tǎhú ndí ní cùu ní dama ndí ñⁿ cóhó comidá.

17 Te nchòhó sa nàha-ndo sá cùtnàhá ní cuiní ndí Esàú cá cáⁿ tǎhú tǎtá ndí núú Yă Ndiöxí cuèndá nchaa sá ndúú tǎhú ndí ní cùu, te ñá túú ní xicáⁿ tǎhú tǎtá ndí núú Yă Ndiöxí nàcuáa cuiní méé ndí ní cùu. Te ní ndáhyú víhí ndí, te cuèi ducaⁿ ñí quide ndí dico ñá túú ní ndàcu-gá ndí nàníhí ndí tǎhú sǎ ñí dama ndí comidá.

18 Te cue ñáyi-ndé israhél ní sátuhá-yu ñⁿ yucu núú càyú ñuhú, te nchòhó ñá túú ndéé ducaⁿ sàháⁿ tuha-ndo ñⁿ yucu núú càyú ñuhú dàtná ní quide cue ñáyi-áⁿ. Te cùtnàhá ducaⁿ ñí sátuhá-yu yucu-áⁿ te ní cunee víhi níhí yucu-áⁿ, te ní quene táchí ñíhi.

19 Te ní tecú dóho-yu ní cáháⁿ ñⁿ cútú, te ní tecú tucu dóho-yu ní cáháⁿ Yă Ndiöxí ní cáháⁿ ndihi ñaha-gǎ xíi-yu. Te nchaa ñáyi-ndé ní tecú dóho-xi ní

cáháⁿ-gá te ní cuiní-yu sá vă cãháⁿ-gá.

20 Te ducaⁿ nĩ quidé-yu chi ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuěi ñⁿ quiti nà yáha xití yucu-a, te cahni-ndo-di ndìhi yúú àdi ndìhi ñⁿ yutnu puyá”, duha ní cachí-gá.

21 Te sá dúcáⁿ nĩ quide-xi ní xiní-yu xĩaⁿ ío ní dáyùhú ñáhá-xí xìi-yu. Te tnahá té Moisés ní yùhú-dé, te ní cachí-dé: “Quìdi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiu-áⁿ nĩ sáháⁿ tuhá-yu yucu-áⁿ, dico cada iní-ndó sã sã ní tuha-ndo yùcu Sión sá ndécú nũú ndécú Yã Ndiõxí, ndìhi ñuú-gá ñuú Jerusàlén sá cáa àndiu te ñu-gá cúú-gã Yaá ndécú nchàa nduu nchaa quíú. Te ñu-ni xíaⁿ xĩndecu cuéhé víhi cuè espíritú xínú cuèchi núú-gã

23 chíñùhu ñaha-xi xii-gá. Te nchòhó cúú-ndó cuè ñáyiu cùu cuendá Yã Ndiõxí, te ní tnahá tnúhu-ndo ndìhi nchaa dava-gá ñáyiu cùu cuendá-gá, ñáyiu yòdo tnuní núú tütú-gã ndécú àndiu, te ñu-ni ñáyiu-áⁿ cuãñaha-gã xii-yu sá ndúú tãhũ-yu. Te nchòhó ní tuha-ndo Yã Ndiõxí Yaá cada ndáá yícá cuèchi nchaa ñáyiu. Te cada iní-ndó sã nĩ tnahá tnúhu-ndo ndìhi cue ñáyiu ní quide ndáá ní xĩndecu ichi Yá Ndiõxí ñuyíú-a. Te ñáyiu-áⁿ ñà túú tnahí-gá ná cúmãñi-yu vitna ndécú-yu núú-gã.

24 Te ní tnahá tnúhu-ndo ndìhi Xitohó Jesucrìstú Yaá ní quide nàcuáa cada Yá Ndiõxí ingá núú sã văha sá cúú-xí nchàa nchoo ñáyiu ndècu ñuyíú-a, chi ní sati níñí-gã te ní xihí-gá núú cùrúxí. Te níñí

Xĩtohó Jesucrístú ñá túú ñⁿ-ni cuu-xi ndihí níñí ndĩ Àbél, chi ðiu cuèndá níñí-gă-áⁿ ñi quide càhnu iní Yă Ndiöxí nchaa cuéchi-o.

²⁵ Núu xíãⁿ ío cada cuèndá-ndó vă dáquèe tihú-ndó tnũhu càháⁿ Yă Ndiöxí, chi nchaa ñáyiu ní xíndecu ndéé sanaha dùcaⁿ ní quidé-yu ní dáquée tĩhũ-yu tnúhu ní cáháⁿ-gá ñuyíú-a sá cúú-xĩ-yu. Te ñá túú ní cãcu-yu chi ní nacháhu-yu sá dúcáⁿ ñi quidé-yu. Te uuⁿ-gá tucu nchoo chi vá cãcu-o te núu ducaⁿ na dàquèe tihú-ó tnũhu càháⁿ Yă Ndiöxí ndéé andiũ sã cúú-xí-ó.

²⁶ Te cútnàhá ní cáháⁿ Yă Ndiöxí ndéé sanaha te ní quidi-xi ñuyíú. Te vitna càchí-gá: “Yúhú quidi tucu-í ingá xito ñuyíú, te ñá díú mèe-ni ñuyíú ducaⁿ quidi-í chi tnàhá andiũ quidi-í”, càchí-gá.

²⁷ Te sá dúcáⁿ càháⁿ-gá sá ingá xito tucu ducaⁿ càda-gá xíãⁿ cútnùní sá ncháándì túhú sá tũu ndèhe-o danaa-gá. Te nchaa sá ñà túú ndèè tũu quini-ó ñuyíú-a xíãⁿ vá quídí-xí te ni vă náá-xí.

²⁸ Te núú ñi cachí Yă Ndiöxí nduu táhú-ó cùndecu-o chi mee-gă táxí tnùní-gá xíãⁿ, te ni vă quídí-xí te ni vă náá-xí. Te xíãⁿ ío xìni ñuhu-xi ndacáⁿ táhú-ó núú-gă, te yĩñũhu yĩñũhu cunu cuechi-o núú-gă nàcuáa cuu váha iní-gá, te ducaⁿ cùhuⁿ iní-ó sã ïo càhnu cuu-gá.

²⁹ Te Tãtá-ó Dũtú Ndiöxí cúú-gă dàtná ñⁿ ñuhú chi danàa-gă nchaa sá ñà túú quide nacuáa cuu váha iní-gá.

13

Nàcuáa tàú-xi cada-o cuèndá cuu váha iní Yă Ndiöxí

1 Te nchaa nchòhó ñáyiú ndècu ichi Xítohó Jesu-crístú, vá dáñá ndèé-ndó cùu iní tnáhá-ndó nàcuáa ndècu-ndo ichi-gá.

2 Te cunaha-ndo sã nõu ió ñáyiú ñùhu ichi ní quexió-yu vehe-ndo te cuáñaha-ndo vèhe nde-tatú-yu, te cuáñaha-ndo sã cáxi-yu. Chi davá-yu ndéé espíritú xínú cuèchi núú Yá Ndiõxí ní sáháⁿ vehé-yu ní queheⁿ cuendá-yu te ñá túú ní cùtnuní iní-yu sá díú espíritú xínú cuèchi núú-gã cúú-xí.

3 Te ndacu tucu iní-ndó cuè ñáyiú xixíhi ve-caá, te cada iní-ndó sã tnáhá-ndó yìhi-ndo vecaá ndihí-yu. Te ndacu tucu iní-ndó nchàa ñáyiú ío ndòho, te cada iní-ndó sã tnáhá-ndó ndòho-ndo ndihí-yu.

4 Te nchaa ñáyiú na càchí-yu sá ìⁿ sá vãha cùu-xi sá ìⁿ téé ndihí ìⁿ ñadìhí ná nihí tnáhã-yu candeca tnáhá-yu. Te nchòhó cue téé vá cání ìní-ndó cãháⁿ ndihí-ndo ñàdihí te núu ñá díú ñàdihí-ndó cùú-yu. Te ducaⁿ-ni nchòhó cue ñáyiú dìhí tucu vá cání ìní-ndó cãháⁿ ndihí-ndo tée te núu ñá díú yì-ndo cuu-güedé, chi Yá Ndiõxí dandòho-gá nchaa ñáyiú ndècu ichi díí ìní.

5 Te vá cúhúⁿ ìní-ndó mèe-ni díhúⁿ. Te núu nándi cùu nchaa sá ndécú ndihí-ndo te díu-ni nchaa xiáⁿ sa nduu vétú ìní-ndó, chi Yá Ndiõxí ní cachí-gá: “Ni ìⁿ nduu vá dáñá nihnu ñaha-í xii-ndo, chi nchaa-ni nduu chindee ñaha-í”, duha ní cachí-gá.

6 Te xiáⁿ nõu nchoo ñè yuhu ni iní-ó cãháⁿ-ó ìⁿ ìⁿ-o, te cachí-ó:

Yá Ndiõxí cúú-gã Yaá chíndèe ñaha xii-í,

núu xiǎⁿ ñá túú yùhú-í cuëi nándi càháⁿ ñáyiú cada ñáhá-yu xii-í.

Duha cachí-ó.

⁷ Chí ndácú iní cue téé ní sanu ichi ñaha xì-ndo ichi Xítohó Jesucrístú cue téé ní cáháⁿ tnúhu Yá Ndiöxí núú-ndó, te ío váha chí nácuãha cuendá nàcuáa ní quide nchaa cue téé-áⁿ ñí xíndecu-güedé ndéé ní sáá nduu ñí xíhí-güedé. Te ío quindáá iní-ndó Yá Ndiöxí dàtná ní xóo cada cue téé-áⁿ.

⁸ Te dàtná-ni ní quide Xítohó Jesucrístú ndéé sanaha ñiú-ni ducaⁿ quide-gá vitna, te ñiú-ni ducaⁿ càda-gá ndéé núú cuáháⁿ núú vëxi.

⁹ Te vá dáñá-ndó mèe-ndo dandahú ñáhá ñáyiú dacàháⁿ ñáhá xì-ndo natuha-ndo ingá ichi, ñáyiú dànèhé tnàha ñáyiú-xi nándi sá ñí cutúha-yu, te nchaa xiǎⁿ ñá túú ñiⁿ-ni caháⁿ-xi ndihí tnúhu sá ndécú ndihí-ndo. Te Yá Ndiöxí chíndèe ñaha-gá xii-o nàcuáa níhí ndéé-ó cùndecu-o ichi-gá, te ducaⁿ te cuu-xi sá vãha sá cúú-xí-ó, te ñá díú cuendá ñiⁿ sá xéxí-ó ñihí ndéé-ó ndècu-o ichi-gá. Te dava ñáyiú càchí-yu sá dává núú comidá cuu caxi-o te dava ñáhá nàcuáa níhí ndéé-ó cùndecu-o ichi-gá, dico ñá ndàá sá sã dúcáⁿ vã cáxí-ó nchàa núú comidá níhí ndéé-ó cùndecu-o ichi-gá.

¹⁰ Chi Xítohó Jesucrístú ní xíhí-gá cuendá-ó núú cùrúxí, te nchaa ñáyiú nchìcúⁿ nihnu-ni quide nchaa nacuáa ní quide nchaa dútú ñí xinu cuechi núú Yá Ndiöxí ndéé sanaha, ñáyiú-áⁿ vã cúú tnàhá tnúhu-yu ndihí Xítohó Jesucrístú Yaá ní xíhí núú cùrúxí sá dúcáⁿ quidè-yu.

¹¹ Chi dútú cùnù-gá ní xíndecu ndihí cue ñáyiú isràél, téé-áⁿ ñí xóo canèhe-dé níñí nchaa quiti ní xóo cahni-dé ní xóo quíhu ndéé xití cuàrtú ní

cuu í-gă. Te ducaⁿ nǐ xóo cada dútu-ăⁿ cuendá cada cǎhnu iní Yǎ Ndiǒxí nchaa yícá cuěchi ñáyiú, te cuñú nchaa quiti-áⁿ nǐ xóo cahmi-güedé ìⁿ xio yuhu ñùú.

12 Te ducaⁿ nǐ yáha Xítóhó Jesucrístú chi ndéé ìⁿ xio yuhu ñùú ní sahani ñaha-güedě xii-gá. Te cuendá níñí-gă sá nǐ sati núú cùrúxí núú nǐ xíhí-gá, ní nduu ndoo ní nduu nine iní cue ñáyiú sàndáá iní ñáhá xii-gá.

13 Te vitna chí ná tùha-o Xítóhó Jesucrístú te cada ndee iní-ó ndòho-o datná ní ndoho-gá.

14 Te ñuyíú-a ni ìⁿ xichi ñá túú ndéé cáá ìⁿ ñùú cudíi ni caa ni quíhíⁿ cuendá cundecu-o, dico ducaⁿ-ni ñùhu iní-ó ìⁿ xichi núú ndúú tǎhú-ó cùndecu-o ni caa ni quíhíⁿ.

15 Te núu xǎⁿ xíní ñùhu-xi sá vǎ dáñá ndéé-ó chĩñuhu-o Dútu Ndiǒxí chí Xítóhó Jesucrístú ní quide-gá nǎcuáa ndacu-o tnàhá tnúhu-o ndìhi Yá Ndiǒxí, te òré cǎháⁿ ndìhi-o-gă te nuu núu ndacáⁿ tǎhú-ó nǔú-gă. Te nchaa tnúhu cǎháⁿ-ó òré cǎháⁿ ndìhi-o-gă cúú-xi dàtná ìⁿ tǎhú sǎ cúú-xí-gă.

16 Te vá dáñá ndéé-ndó càda-ndo mee-ni sá vǎha cundecu-ndo, te ducaⁿ chĩndee tnaha-ndo ìⁿ ìⁿ-ndo ndìhi sá ndécú ndìhi-ndo. Te núu ducaⁿ na càda-ndo te cani iní-ndó sǎ cúú-xí dàtná ìⁿ tǎhú sǎ ìo vǎha cùu iní Yá Ndiǒxí.

17 Te quindáá iní-ndó càda-ndo nchaa nacuáa cǎháⁿ cue tée yìndaha ñaha xii-ndo nacuáa ndècu-ndo ichi Xítóhó Jesucrístú, chí ḍiú cue téé-áⁿ quidé cuendá ñáhá-güedě xii-ndo nǎcuáa cundecu váha-ndo nǔú-gă. Te sáá nduu nǎcani tnúhu-güedé núú-gă nǔu ní quide váha-güedé àdi ñá túú ní quide

váha-güedé ní xíndecu ndihí ñaha-güedě xii-ndo. Te núu ducaⁿ na càda-ndo quíndáá iní-ndó-güedě te cudíí ìní-güedé cundecu ndihí ñaha-güedě xii-ndo, te vá ndihú iní-güedé. Te núu vá dúcáⁿ càda-ndo te vá cúu-xí sǎ vǎha xii-ndo nchàa sá quidé-güedě sá cúu-xí-ndó.

¹⁸ Te càháⁿ ndàhú-í núú-ndó sǎ cǎháⁿ ndihí-ndo Yǎ Ndiǒxí cuèndá-ndí. Te nchúhú cùtnùní ndáá iní-ndí sá ñà túú nǎ cúmǎní-ndí núú Yǎ Ndiǒxí, te ducaⁿ chi ndùcu-ndí nàcuáa quide-ndí cundáá-ndí núú-gǎ.

¹⁹ Te càháⁿ ndàhú tucu-í núú-ndó sǎ ïo cǎcáⁿ táhú-ndó núú Yǎ Ndiǒxí cuèndá sá mée-gǎ ná cǎdá te ïo ndihí quixi coto ñaha tùcu-í xii-ndo.

Tnúhu ndéé núú nǐ ndihí-ná

²⁰ Te Yǎ Ndiǒxí Yaá quidé cùu váha iní-ó ndècu-o, Yaá-áⁿ nǐ dándótó-gǎ Xítohó Jesucrìstú. Te Xítohó Jesucrìstú-áⁿ cúu-gǎ dàtná ìⁿ toli ïo-gǎ quéné cǎva xìto mbéé. Te ducaⁿ sǎtnahá-xi cùu-gǎ cuèndá sá nǐ sati níñí-gǎ te ní xíhí-gǎ, te ducaⁿ nǐ cuu cuèndá sá nǐ quide ndáá-gǎ ndihí Yǎ Ndiǒxí sá cǎdá-gǎ ìngá núú sǎ vǎha sǎ cúu-xí nchòo cue ñáyíu ndècu ñuyíu-a. Te nàcuáa ní quide ndáá-gǎ ndihí Yǎ Ndiǒxí te ñiu-ni ducaⁿ càda-xi núú cuaháⁿ núú vǎxi.

²¹ Te xìcáⁿ táhù-í núú Yǎ Ndiǒxí sá mée-gǎ ná chìndee ñaha-gǎ xii-ndo cuèndá cada-ndo mée-ni sá vǎha nàcuáa cuìní mée-gǎ, te mee-gǎ ná cǎdá ñaha-gǎ xii-o nchàa sá vǎha sá sání iní-gǎ. Te ñiu-ni ducaⁿ na tàuchiuⁿ-gǎ cada Xítohó Jesucrìstú sá cúu-xí-ó, duha xìcáⁿ táhù-í núú-gǎ. Te vitna nchaa-o chí ná càchí-ó sǎ ïo càhnu cuu Xítohó Jesucrìstú ni caa ni quíhíⁿ. Te ducaⁿ na cùnduu.

²² Te càháⁿ ndàhú-í núú nchòhó ñáyiú ndècu ndìhi-í ichi Xítóhó Jesucristú sá cádá càhnu iní-ndó nàcuáa ndùu nchaa tnúhu càháⁿ-í dásàhú ñáhà-í xii-ndo, chí ñá túú vai tnúhu chido tnuní-í núú tütú-a sá cúú-xí-ndó.

²³ Te càchí tnúhu-í xii-ndo sã tẽ Timùteú téé ndècu ndìhi-o ichi Xítóhó Jesucristú ní cácu-dé ñá túú-gã yíhí-dě vecaá. Te núu na quèxio ndíhi-dé núú ndécù-í te quixi-í ndìhi-dé núú ndécú-ndó quìxi coto ñaha-ndí.

²⁴ Te cúñaha-ndo sã ïo na càda ndee iní nchaa cue téé yìndaha ñaha xii-ndo nacuéa ndècu-ndo ichi Yá Ndiöxí. Te ducaⁿ cùñaha tucú-ndo xii nchaa dava-gá ñáyiú cùu cuendá-gá sá ïo na càda ndee iní-yu. Te cue ñáyiú nàcióⁿ Itàliá ñáyiú ndècu ndìhi-o ichi-gá càchí-yu sá ïo cada ndee iní-ndó.

²⁵ Te Yá Ndiöxí ïo na chìndee chitúu ñaha-gã xii-ndo nchàa-ndo. Te ducaⁿ na cùnduu. Te ío chí cádá ndèe iní-nã vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

872f7754-0986-5ecd-a059-925a708a6939